

ANG DIOS NGA GINAPAILA ANG IYANG KAUGALINGON PINAAGI SA IYANG MGA KINAIYAHAN



Medyo nasorpresa gayud ako nga makita ang akong higala, si Joseph Boze, dinha, ug akong gibalikan ug migahin og gamay'ng oras aron makiglamano kaniya.

² Moabli na kita karon diha sa Pulong sa Dios, ngadto sa Mga Hebreohanon, sa ika-1 nga kapitulo. Gusto kong basahon, ang usa ka bahin, sa ika-1, ika-2, ug ang ika-3 nga bersekulo, aron sa pagkuha og usa ka teksto alang niining gabii.

Ang Dios, sa daghan ug sa nagkalainlaing mga paagi misulti kaniadto sa karaang mga kapanahonan ngadto sa atong mga ginikanan pinaagi sa mga propeta,

Apan niining katapusan nga mga adlaw misulti kanato pinaagi sa iyang Anak, nga iya nang gitudlo nga manununod sa tanang mga butang, nga pinaagi kaniya usab gibuhat niya ang mga kalibutan;

Nga sanglit Siya mao dinha ang dan-ag sa iyang himaya, ug ang mao gayud nga dagway sa iyang pagkamao, ug mao ang nagasapnay sa kalibutan pinaagi sa pulong sa iyang gahum, nga sa gibuhat na niya . . . milingkod sa toong kamot sa Halangdon sa kahitas-an;

³ Iduko nato ang atong mga ulo karon alang sa pag-ampo. Ug karon diha sa Iyang Balaanong Presensiya, kung aduna man kamo og unsa man nga hangyo nga gusto ninyong ipahayag ngadto Kaniya, mahimo bang itaas ninyo ang inyong kamot, ug mao kana ang inyong hangyo, nga ang Dios maga . . .

⁴ Among Langitnong Amahan, nagaduol kami karon sa atubangan sa Imong trono, pinaagi sa pagtoo diha sa Ngalan ni Jesus Cristo, nga Imong Anak. Ug gihatagan kami sa niining kasiguradohan, nga, “Kung mangayo kami ug bisan unsang butang sa Iyang Ngalan, ihatag kini.” Ug nasayod Ikaw sa among mga tinguha ug sa among mga panginahanglan, ug nagsaad Ikaw nga Imong sangkapan ang tanan namong panginahanglan. Busa, Amahan, mag-ampo kami sumala sa Imong gitudlo kanamo, “Umanhi ang Imong Gingharian. Pagabuhaton ang Imong kabubut-on dinhi sa yuta, maingon man sa Langit.” Nga ang among mga hangyo, karong gabhiona, mahimong sumala sa Imong kabubut-on nga ihatag kini, ug itugot kanamo ang mga niining prebilibiyo. Dihogi ang Pulong, Ginoo, ug ang

tanang mga mamumulong ug ang mga tigpaminaw, ug hinaut nga ang Balaang Espiritu mokunsad ug mao ang mamuhat sa Pulong, karong gabhiona, sa among taliwala. Kay kini among ginapangamuyo diha sa Iyang Ngalan. Amen.

Makapanglingkod na.

⁵ Ugma sa buntag, sa nasabtan ko, mao ang pang-pamahaw nga tigum sa Full Gospel Business Men. Kasagaran, diin gani aduna sila og sanga sa kapunongan, aduna ako og prebilihiyo sa pagwali diha sa ilang pagpamahaw. Bisan hangtud karon, kana lamang nga kapunongan, nga dili usa ka organisasyon, kondili, ang bugtong grupo nga ako—ako kabahin, ang Christian Business Men. Ug nagasulti lamang ako alang kanila, bisan ngadto sa ubang nasud.

⁶ Karon, sa niining gabhiona, ginasalig nato nga kining tigum dili kini mamahimong kawang. Mianhi ako, nga kapoy, pagaw, ug medyo dunay gibati sa tutunlan, gumikan . . .

⁷ Gikan ako sa Tucson diin maayo kaayo didto ug mamala, ug pag-anhi ko dinhi ug maayo usab ug umogon lang, busa medyo adunay kalainan. Kung ang tanang umog ania kaninyo dinhi, kung maipadala lang ninyo kini padulong kanamo didto, pasalamat namo kini. Apan dili ninyo mahimo kana, siyempre.

⁸ Apan sultihan ko kamo og usa ka butang, adunay usa ka istorya didto. Ang tanan namong—among—among mga butang didto sa Arizona, ang among mga kakahoyan, puno og mga tunok. Ang tanan adunay tunok. Tungod kay mauga kini. Karon kung kanang mao ra nga sapinit ipatubo dinhi, mamahimo kining usa ka maanindot nga dahon. Kita n'yo, tungod kini nga walay tubig didto, kana ang hinungdan nga nagakahimo kining tunok.

⁹ Ug sa diha nga ang iglesia mawad-an og Tubig sa Kinabuhi, nagakauga kini ug nagakahimong tunokon, usab, mangtunok ug mangtusok og bisan unsa na lang. Apan diin gani adunay nagadagayday nga mga tubig sa Kinabuhi, ginapausbong niini ang dahon ug ginapahumok kini, malomo ug malulot, balaan ug nahamut-an sa Dios. Busa hinaut nga tubigan kita sa Ginoong Dios, karong gabhiona, nga dili kita mamahimong mga tunok; kondili mangahimo kitang mga maayong dahon nga ang nahisalaag nga mga tawo makapanglingkod ilalum sa atong kahoy'ng landongan ug magpahupay sa ilang mga kalag.

¹⁰ Karon gusto ko mokuha og teksto, karong gabhiona, kon itugot sa Gino, ug ginapaduol ko kining gamay'ng mikropono sa ingon ka duol nga mahimo ko, tungod sa kahinay sa akong tingog. Gusto ko kuhaon, gikan sa pagbasa dinhi sa Mga Hebreohanon 1:1, gusto kong mokuha og usa ka teksto: *Ang Dios Nga Ginapaila Ang Iyang Kaugalingon Pinaagi Sa Iyang Mga Kinaiyahan*. Usbon ko pag-usab, tungod nasayod ako nga

dili maayo ang acoustics dinhi. Ginapaila sa Dios ang Iyang Kaugalingon pinaagi sa Iyang mga kinaiyahan.

¹¹ Karon, halos ang bisan unsang butang maila pinaagi sa mga kinaiyahan niini. Ug aduna ako og pipila ka mga Kasulatan dinhi nga akong . . . ug listahan, nga akong pahinungdan. Karon, ang kinaiyahan sa bisan unsang butang mao'y nagapaila kung unsa kini.

¹² Karon, sama sa tanang kinaiyahan, maila ang mga bulak, sa makadaghang higayon, pinaagi sa ilang kinaiyahan. Kung halos magkapareho man sila, ang usa ngadto sa laing usa pa, ang kinaiyahan sa nianang bulak mao'y magapaila kung unsa nga bulak kini. Ug ang tanan sa lasang, sa makadaghang higayon . . .

¹³ Ako—usa ako ka mangangayam. Ug kinahanglan imong hibaloon ang kinaiyahan sa mananap nga imong ginapangayam, kay kondili usahay malingla ka gayud. Pananglitan, sama sa Stone Sheep didto sa British Columbia. Didto ako sa Yukon niadtong tinglagas, ang pipila sa mga kaigsoonan dinhi karon kauban ko niadto, ug nagapangayam kami didto.

¹⁴ Karon kung dili mo mahibaloon ang kalainan, sa diha nga ginasubay mo ang tunob sa karnero o lagsaw, dili mo masulti ang kalainan gawas kung usa ka ka utokan nga mangangayam. Tungod kay, pareho lang ang marka sa ilang tunob; manglukso sila pagmolagiw sila. Ug dayon aduna ka'y makita nga atua sa halayo, nga natago ang ulo, aba, imong—malisuran kang hibaloon ang kalainan nila. Halos pareho ra ang kadakuon nila; diha sa lubot nga bahin, puti kini, sama gayud sa lagsaw. Malisod ilhon ang mga niini. Apan ang mga sungay niini mao'y magpaila sa iyang ilhanan, pinaagi sa mga sungay niini. Ang karnero adunay mga lingin nga sungay, ug ang lagsaw adunay talinis nga sungay. Ug ang usa pa ka butang, ang lagsaw wala nagaadto sa mga habog nga dapit, aron mokaon.

¹⁵ Ug dayon ang kanding, ang linakwan niini, usab, aduna og ilhanan diha sa kanding, ug sa karnero, nga kinahanglan gayud nga masayran mo ang kalainan diha kanila, sa dihang makaadto ka sa habog nga dapit, tungod kay pareho silang nagapuyo sa mga habog nga dapit sa bukid. Kinahanglan nga masayran mo ang kalainan. Apan kung mahimatikdan mo, ang—ang kanding nagakadugmo sa iyahang kaugalingon samtang nagalakaw kini; sa laing bahin, ang karnero nakapahiluna ang tiil niini nga sama *niini*, samtang nagalakaw kini. Bisan ang kinaiya niini nga mahibal-an ang marka sa iyang tunob. Maila mo ang imong pangayamnon pinaagi sa mga kinaiya sa kung unsa ang ginabuhat niini, ug ang lihok niini, ug kung unsa ang ginakaon niini, ug tanan na. Ginapaila niini ang iyang kaugalingon pinaagi sa iyahang kinaiya. Ug dayon kurata ang usa niini, ug tan-awa kung unsay buhaton, masulti mo na sa lihok pa lang niini. Masulti mo pinaagi nianang kinaiyahan sa nagkalainlaing mananap.

16 Dayon nahimatikdan ba ninyo, wala ko kabalo kung aduna ba mo niini dinhi o wala, yellowhammers; bueno, flicker ang hustong ngalan alang kanila, ug ang jay bird. Mga mao ra ang gidak-on sa jay bird og sa yellowhammer. Ug sa pagmakita ninyo ang maong duha nga nagalupad, halos pareho ra sila nga matang sa langgam. Kung dili man ninyo makita ang kolor, apan bantayi lang sila, maila ninyo kung asa ang yellowhammer. Ang jay bird nagalupad, nga halos, diretso. Apan ang yellowhammer, nga nagakampay sa iyang mga pako; sa diha nga ginakampay niini ang iyang mga pako, paubos kini ug dayon pataas, paubos ug dayon pataas. Kita n'yo, pauntol-untol siya, nga sama *niana*, ug masulti ninyo nga mao kana ang kinaiyahan sa yellowhammer, sa pamaagi sa iyang paglupad.

17 Kung nahimatikdan ninyo ang—ang manatad sa dihang mogawas na siya, kung unsa siya maglupad. Ug dayon bantayi pag-anaa mo dinha sa kalapukan, mahimong anaa dinha ang manatad, ug ang—ang patagong pagtiro. Nasayod kamong mga mangangayam niana. Ang Wilson's snipe ug ang jacksnipe, nagapaila sila diha sa ilang pagtungang ug pinaagi sa ilang paglupad. Nagapaila sila pinaagi sa ilang mga kinaiya sa paglupad, sa kung unsa nga matang sila nga langgam. Mao nga, kung inyong madungog ang mga niini, masulti ninyo kung unsa kini, sa paagi lamang sa ilang pagtungang, kung unsa siya, pinaagi sa kinaiya sa iyang paglupad.

18 Sama sa lalaki ug babaye. Pareho silang tawo, apan ang babaye aduna og lahi nga mga kinaiyahan kaysa sa usa ka lalaki. Nabasa ko dinhi, dili pa lang dugay, ang mahitungod kang Solomon ug sa reyna. Wala pa ako moabot sa punto aron iwali ang akong gamay'ng Mensahe dinhi, kaninyo, bahin sa maong reyna sa Habagatan, nga mibiyahe aron makigkita kang Solomon, ug aron makita kanang gasa sa pagpang-ila. Nabasa ko ang bahin niana, dinhi dili pa lang dugay, ug miingon sila, nga, “Ang usa nga sulbaronon sa atubangan ni Solomon, kaniadto mao, nagkuha og babaye kining reyna, o mga kababayan-an, diay, ug gipangsuotan sila sama sa lalaki.”

19 Karon, talagsaon kadto niadtong adlaw, apan sigurado kini nga anaa sa urog-sa-panahon, karong panahona. Ug—ug nasayod kamo nga sayop gayud kana. Ang Biblia miingon nga ang usa ka babaye dili gayud magbuhat niana. “Dulumtanan kini alang sa usa ka babaye nga magsul-ob og bisti nga iya sa lalaki.” Ug ang dili-mausab nga Dios ang nagsulti niana, busa kana ang kamatuoran.

20 Busa makita nato nga si Solomon, gitan-aw lang sila, gipalakaw niya sila o gipabuhat og usa ka butang, ug sa dihadiha dayon miingon siya, “Mga babaye kini.” Kita n'yo, masulti niya pinaagi sa kinaiya sa babaye, sa kung ginaunsa niya pagdala sa kaugalingon niya, nga siya usa gayud ka babaye ug dili lalaki.

²¹ Ug ingon niana gayud sa halos tanan nga butang, pinaagi gayud sa iyahang mga kinaiyahan. Sama lang sa daghanang mga tawo nga mga walhon, ug tuohon. Adunay mga kinaiyahan sila sa pamaagi sa ilang pagdala sa ilang kaugalingon. Masulti ninyo kon kini ba tuohon- o walhon nga tawo, pinaagi sa gawi nila sa ilang kaugalingon, sa paagi sa ilang pagtunol nga gamit kanang wala nga kamot o tuo nga kamot.

Ug hinumdumi, aduna si Jesus og butang nga sama niana, nga . . .

²² Ang maong duha ka kamot halos lang . . . Magkapareho sila. Aduna ang mga niini og sama nga matang sa mga tamla-sa-kumagko, tamla-sa-tudlo, lima ka mga tudlo; kumingking, tudlo, ug uban pa. Maingon ang tuo nga kamot ug ang wala nga kamot aduna og magkapareho nga mga tudlo, nga kasagaran, mao ra ang sukod sa kamot, sa eksakto gayud. Ug ang gikalahi lang niini, diha kanila, ang usa mao'y wala ug ang laing usa mao'y tuo. Mao lang kana ang pagkalahi nga masulti ninyo. Ang usa mao'y wala, ang laing usa tuo.

²³ Busa diha niana, miingon si Jesus . . . Medyo mohatag ako og usa ka gamay'ng punto dinhi. Miingon si Jesus, sa Mateo 24, nga, "Ang mga kinaiya sa Espiritu mamahimong magkapareho sa ulahing mga adlaw, nga halos pareho na gayud nga ipahisalaag niini ang mga pinili kung mahimo pa." Kita n'yo, ila gayu'y . . .

²⁴ Tan-awa ninyo ang inyong mga kamot ug ipataas ninyo kini. Tan-awa, kon dili ba ninyo mahimatikdan kini, ang usa niini mao ra ang hitsura sa usa pa, bisan asa mo tan-awon, apan ang usa niini mao'y wala ug ang laing usa niini mao'y tuo.

²⁵ Ingon niana ang mga espiritu sa ulahing adlaw. Daw sa magkapareho sila, apan aduna sila og kinaiyahan nga mao'y magapaila kanila. Ang usa husto, ug ang laing usa niini sayup, ug maila kini pinaagi sa kinaiyahan niini.

²⁶ Maila ang Espiritu sa Dios pinaagi sa kinaiyahan Niini. Kita n'yo? Ang Espiritu sa Dios, ug ang espiritu nga iya sa iglesia. Adunay espiritu ang iglesia, ug Espiritu sa Dios nga dili gayud pareho sa espiritu sa iglesia, bisan unsa pa.

Adunay denominasyonhong espiritu.

²⁷ Adunay espiritu nga pang-nasudnon. Adunay espiritu nga iya sa nasud. Sa matag nasud, nga maadtoan ko, pagsulod mo, makakaplag ka og lahi nga espiritu. Niadtong miadto ako sa Finland, mga maayong tawo sila, apan adunay espiritu didto nga sa Finland mo lang makita. Miadto ako sa Germany, adunay espiritu didto nga sa Germany mo lang makita.

²⁸ Dinhi dili pa lang dugay, giubanan ko ang akong asawa, diin didto pa kami nagpuyo sa Indiana, pila na ka tuig ang milabay, ngadto sa gamay lang nga supermarket. Bag-ohay lang ako nakauli niadto. Kinahanglan namo nga moadto aron mamalit

og pagkaon. Ug sa nagapadulong ako paingon didto, kami. . . Panahon kadto sa ting-init, tingali dili kamo motoo niini, apan nakatagbo kami og usa ka babaye nga nakabistida. Ug talagsaon kaayo kadto, ako. . . Nakapakurat kadto kanako. Ako—miingon ako, “Tan-awa kana, medyo talagsaon kana, nakabistida kana nga babaye.” Ang uban pa kanila nagasul-ob niadtong bisti nga dili. . . dili angay sa usa ka babaye. Ug—ug miingon ang akong asawa. . . Miingon ako, “Bueno, mao kana ang Americanhong espiritu, kita n’yo, ang espiritu nga iya sa America.”

²⁹ Karon, ang espiritu nga iya sa America, usa kini ka. . . usa unta ka Cristohanon nga nasud, apan ang espiritu niining nasura dili Cristohanon. Mahimo kining tawgon nga usa ka Cristohanon nga nasud, apan minilyon ka milya ang gilay-on gikan niini, diha sa kinaiyahan. Mao nga, kadto nga babaye, ingon ako. . .

Ingon sa akong asawa, “Bueno, dili ba mga Americano man kita?”

³⁰ Miingon, ako miingon, “Dili. Nagpuyo lang kita dinhi. Kini ang atong nasud. Kita—kita—nagapuyo lang kita dinhi. Mahal nato kini. Kini ang pinakamaayo nga nasud sa kalibutan. Apan, bisan pa niana, dili kita mga Americano.” Ingon ako, “Natawo kita gikan sa Itaas. Mikunsad ang Balaang Espiritu, ug sakop kita sa usa ka Ginghamian. Nga kini dili iya niining kalibutan.” Ingon ko, “Mao kana kon ngano nga ang atong mga igsoong babaye nanagsul-ob og mga maugdang nga bisti, taas ang mga buhok, nga wala nagapang make-up. Kita n’yo, ang ilang mga kinaiyahan mao ang nagapaila kanila ingon nga ‘mga balaan ngadto sa Ginoo,’ mga gikan sila sa Itaas.”

³¹ Busa, nagapangita kita og usa ka Ginghamian. Nagapaabot kita og usa ka Hari nga moabot ug nga magadawat sa mga Iyaha ngadto sa Iyang Ginghamian. Ug maila sila pinaagi sa ilang—ilang mga kinaiyahan, nga ang ilang mga bahandi wala dinhi niining kalibutana o niining nasura. Atua kini sa itaas, didto sa Himaya. Busa, sila, “Nagapangita sila sa usa ka Lungsod Nga ang Magtutukod ug Magbubuhay mao ang Dios.” Maila sila sa hustong paagi.

³² Kung aduna lang ako unta og igong tingog aron makawali kaninyo sa pipila ka gabii. Apan ako—pagasugdan ko na kana. Karon, maila pinaagi sa mga kinaiyahan niini.

³³ Makita nato dinhi ang maayo nga ehemplo sa panahon sa Israel kaniadto, niadtong paadto sila sa yutang saad. Ug gitawag sila sa Dios kaniadto sumala sa Iyang saad. Iyang giingnan si Abraham nga, ang Iyang. . . ang iyang mga kaliwatan mamahimong mga dumoloong sa usa ka langyaw’ng nasud, sulod sa upat ka gatus ka tuig, ug dayon Iya siyang pagaluwason pinaagi sa daku og gamhanang kamot, ug mangadto sila padulong sa usa ka yuta, kon diin, gisaad na kaniadto, nga nagapaagas kini og gatas ug dugos. Ug dayon sa diha nga ang

maong panahon sa saad nagkahiduol na, adunay miabot nga usa—usa ka Faraon nga wala nakaila sa dakung ministerio ni Joseph sa taliwala nila kaniadto.

³⁴ Ug, tungod niini, ang Dios nagpatungha og usa ka propeta nga ginganlan og Moises. Ug ang maong tawo gitudloan diha sa tanang kaalam sa mga Ehiptohanon. Sa walay duhaduha usa gayud siya kaniadto kahalangdon, maantigo, intelektuwal nga tawo, tungod nga mahimo man niya nga magtudlo og kaalam ngadto sa mga Ehiptohanon. Mora og takus—takus gayud nga tawo para sa maong pagluwas.

³⁵ Apan, nakita n'yo, ang ginatawag nato nga kaluwasan, ug ang ginatawag sa Dios nga kaluwasan, aduna gayud og kalainan.

³⁶ Karon himatikdi kining tawo uban sa tanan niyang mga pamatasan. Nasayod siya nga natawo siya aron sa pagluwas sa kaanakan sa Israel. Bisan pa niana, ang tanan niyang edukasyon, nga mao lang gyud kana ang tanan niyang nahibaloan, ug ingon nga nasayod nga gitawag siya sa Dios aron buhaton ang maong buluhaton, aduna kaniya ang tanan niyang . . . Aduna siya'y iyang Bachelor of Art, ug iyang Ph.D., ug LL.D., ug uban pa. Ug miadto siya didto aron sa pagpahigawas sa Israel, ug bug-os siyang napakyas.

³⁷ Karon himatikdi, kon tan-awon, siya nga halos nakatungtong na ang iyang tiil sa trono sa Ehipto, aron nga mamahimong Faraon, nga mahimo na unta niyang luwason ang mga anak sa Israel human nga mamahimo na siyang Faraon, tungod kay siya kaniadto ang sunod sa linya para sa—para sa trono. Apan, makita ninyo, nga, kung ingon niadto ang gibuhay, dili maila ang kinaiyahan sa Dios sa pagluwas sa Iyang katawhan.

³⁸ Miingon Siya nga Iyang luwason sila. *Iya* nga “ipahigawas sila pinaagi sa gamhanang kamot,” dili nga si Moises gamit ang usa ka gamhanang kasundalohan, kondili ang Dios uban sa gamhanang kamot.

³⁹ Nahibaloan nato nga kining propeta nagpakalagiw ug nagpabilin didto sa kamingawan sulod sa kuwarenta ka tuig. Migugol si Faraon og kuwarenta ka tuig aron mabansay siya diha sa edukasyon, ug migugol og kuwarenta ka tuig ang Dios sa pagtanggap niini kaniya. Busa nahibaloan nato, usa niana ka adlaw, nga siya, didto sa luyong bahin sa kamingawan, natagbo niya ang Ginoong Dios didto niadtong nagadilaab nga sapinit, sa pormang Haliging Kalayo nga atua sa sapinit. Ug gisultian siya nga huboon ang iyang mga sandalias, tungod nga, ang yuta nga iyang gitindogan balaan. Karon tan-awa kining buutan, maalam, edukado nga tawo, nga kaniadto, bantayi ang kausaban sa iyang mga kinaiyahan human nga natagbo niya ang Dios. Nabuhay niya ang pinaka . . .

⁴⁰ Usahay ang Dios nagapamuhat og mga butang diha sa ingon ka yanong paagi, ug diha sa ingon ka halos hinangal nga paagi, ngadto sa karnal nga panghunahuna. Himatikdi ang tawong napakyas gyud og ayo; gamit ang tanang kasundalohan sa Ehipto ug ang tanan nga atua sa palibot niya aron buhaton ang kabubut-on sa Dios, nga gamit ang tanan niyang edukasyon, sa edad nga kuwarenta anyos, diha sa kinamaayohang yugto sa iyang kinabuhi. Ania siya karon, otsenta anyos na ang panuigon, nga pagkasunod buntag, uban sa iyang asawa nga nagasakay diha sa usa ka mula, dala-dala niini ang usa ka bata diha sa iyang bat-ang, ug siya usab adunay dala nga sungkod diha sa iyang kamot, paadto sa Ehipto, aron okupahon kini. Kataw-anan kaayo nga talan-awon! Apan pagpasundayag ra kadto sa mga kinaiyahan sa Dios, tungod aduna Siya’y tawong nagatoo sa Iyang Pulong. Kana lang. Ang butang niini mao nga, mahulagway ninyo kaha ang pang-usa ra ka tawo nga pagpanakup padulong sa Ehipto, nga didto, napakyas kaniadto ang tibuok kasundalohan? Apan unsa man kadto? Ang iyang kinaiyahan, ang iyang mga taktika nabag-o. Paadto siya didto nga sa Ngalan na sa Ginoo, “AKO MAN ANG MAO AKO.” Ang butang niini mao nga, naokupar niya. Nabuhat niya, tungod nga miadto siya didto diha sa Gahum sa Ginoo.

⁴¹ Sa iyang pagpaingon, nga ginapangunahan ang Israel pagawas paingon ngadto sa yutang saad, natagbo niya ang iyang igsoon, ang denominasyonhon niyang igsoon, si Moab. Karon, si Moab, sa unsa mang pamaagi, dili gayu’y mga pagano. Sila’y mga anak sa anak nga babaye ni Lot. Ang usa sa ilang mga anak mao’y—mao si Moab.

⁴² Karon, didto, gusto ko nga inyong mamatikdan kining duha ka nasud, ang kalainan nila. Ania gikan sa Ehipto, usa ka gamay’ng, mga nagkatag, wala’y nasud nga kaadtoan, wala’y mga punoan o wala’y hari, o unsa man, o nga mga halangdon sa taliwala kanila, usa lang ka katawhan nga nagapaingon didto sa yutang saad. Ug ania kinahanglan nila nga moagi latas sa yuta sa Moab. Didto na sila sa utlanan mismo sa maong saad.

⁴³ Ug ang Moab, usab, usa ka mga magtotoo kang Jehovah, ug aduna sila og propeta. Ug ang Israel aduna usab og propeta. Pareho silang adunay mga propeta.

⁴⁴ Ug himatikdi karon, miabot sila sa lugar nga ang propeta sa maong organisadong nasud miadto didto aron tungluhon kining ubang nasud, tungod kay kini naglatagaw lang, wala og tinong lugar nga ka puy-an. Busa didto sila.

Ug nakita kadtong duha ka propeta: Kung pagahisgotan ang pagka-pundamental, pareho sila nga husto. Tungod nga, himatikdi ninyo, si Balaam, nga obispo, nagsulti kanila, “Karon, tukoran ninyo ako og pito ka mga halaran.”

45 Ang pito mao'y kumpleto nga numero sa Dios, nga nagarepresentar sa Pito Ka Mga Kapanahonan Sa Iglesia, ang pito ka adlaw sa paglalang, ug uban pa. Karon himatikdi, pito, ang Dios nakumpleto sa pito.

46 “Pito ka halaran, ug sa matag halaran magbutang og usa—usa ka laki nga vaca.” Karon eksaktong mao ra sa gihapon kana nga halaran nga aduna sila didto sa kampo sa Israel. Sila didto sa Israel, adunay mao ra nga halaran nga aduna sila dinhi; ug mao ra nga halad, usa ka laki nga vaca didto ug usa pud ka laki nga vaca dinhi; usa ka propeta didto ug usa pud ka propeta dinhi. Duha ka nasud, kung ikumpara.

47 Usa ka hingpit nga ehemplo sa maong adlaw nga atong gikapuy-an, kung aduna pa kita og oras aron hisgotan kini. Himatikdi, ang Dios nga ginabuhat kini diha sa usa ka pasumbingay, nga mahibaloan natong, nagakatakdo.

48 Karon, maingon usab, nagkinahanglan si Balaam og usa ka laki nga karnero sa matag halaran. Nagapahinungod kadto sa iyang pagtoo alang sa usa ka umalabot nga Mesias. Usa ka laki nga karnero, usa ka laking karnero, nga mao ra nga halad nga aduna sila didto sa Israel; didto sa kampo sa Israel, ang ania niining... sa Moab. Ang... Sa pagka-pundamental, magkapareho silang husto, apan, himatikdi, pareho gayu'y maka-pundamental diha sa doktrina.

49 Apan kadtong usa ka propeta nga atua sa kampo sa Israel anaa kaniya ang mga kinaiyahan sa Dios ug ang Pulong sa Dios. Nagpabilin siya sa saad sa Dios alang niadtong kapanahonan, tungod kay anaa siya sa linya nga padulong sa yutang saad. Kita n'yo?

50 Karon, kung sa pinakasukaranan nga bahin lang, si Balaam, si Balak mahimong maila nga susama pud ni Moises.

51 Apan, nakita ninyo, si Moises, ingon nga mao ang hustong propeta sa Dios, dili lamang nga anaa kaniya ang mga pagka-pundamental, kondili anaa kaniya ang pagpaila nga iya sa Dios. Kita n'yo, anaa siya sa linya sa pangatungdanan, eksakto sa kung unsay gisaad alang niadto nga kapanahonan; dili alang sa kapanahonan ni Noe, kondili alang gyud niadtong kapanahonan. “Dalhon Ko kamo sa usa ka yuta nga nagapaagay sa gatas ug dugos.” Miadto sila didto, ug ang Israel nailhan uban sa ilang propetang, si Moises, nga aduna og Mensahe alang niadtong kapanahonan. Ang mga kinaiyahan sa Dios maila kaniadto diha kang Moises. Ang Haligi nga Kalayo nagasunod kaniya. Anaa usab kaniya ang mismong pangtabon-sa-sala nga nagapamuhat; dili lang sa pulong, kondili nagapamuhat gayud. Dili sa kung unsa ang mahitabo pa lang sa umalabot; kung unsa ang sa karon mismo!

52 Himatikdi, aduna kaniya ang tumbagang bitin nga gipataas niya alang sa mga sakit ug balatian sa mga tawo, busa si

Moises kaniadto nagapamuhat diay og Balaanong pagpang-ayo. Aduna kaniya ang pangtabon-sa-sala, kadtong tumbagang bitin, nagasimbolo nga ang Dios atua sulod sa kampo, ug ang mga tawo manglantaw lang sa tumbagang bitin ug mangaayo sila.

⁵³ Anaa usab kaniya ang hinampak nga Bato nga nagasunod kaniya. Ug pagpaila kadto sa Dios, aron magpabilin ang mga Tubig sa Kinabuhi sa ilang taliwala, ang kalipay ug kaluwasan, nga sila dili mangamatay kondili adunay Kinabuhi nga dayon. Usa kadto ka tipo sa . . . Kadtong hinampak nga Bato nga atua sa kamingawan mao'y usa ka tipo ni Cristo nga hinampak.

⁵⁴ Dayon, nanagpanaw sila nga nakalina sa mismong saad. Usa na usab kadto ka pagpaila, nga nagapakita sa kinaiyahan sa Dios. Bisan unsa pa ka pundamental ang kining usa diha sa Pulong; pero sa niining usa anaa ang pagka-pundamental, lakip ang timailhan, ug ang kinaiyahan sa Dios sa ilang taliwala. Ang Dios nga ginapaila ang Iyang Kaugalingon. Duha ka propeta, pareho silang mga propeta, ug pareho silang pundamental; apan kang Moises gipaila sa Dios ang Iyang kinaiyahan, tungod kay anaa man uban kaniya ang mga kinaiyahan sa Dios.

⁵⁵ Karon, pag-usab, ang mga kinaiyahan sa Dios kanunay nga supernatural, tungod kay Siya supernatural. Ang Dios supernatural. Kini talagsaon, sa kanunay, sa modernong urog sa panghunahuna sa maong panahon. Nasayod kamo niana. Kanunay'ng ginabungkag sa Dios ang mga sistema, sa—sa pangrelihiyon nga mga grupo sa matag kapanahonan nga nangagi.

⁵⁶ Ug wala ni usa ka higayon sukad-sukad nga adunay tawo o grupo man sa mga tawo nga human nilang giorganisar ang ilang mga kaugalingon sa usa ka mensahe kondili silang tanan nangamatay ug dili na magamit, ug wala na nakabangon pag-usab. Wala og ingon-niana sa kasaysayan. Ang mga Lutheran, mga Presbyterian, mga Methodist, mga Baptist, mga Pentecostal, ug uban pa, wala na nakabangon pag-usab, sa diha nga ila Kining gihimo nga grupo-grupo.

Tagsa-tagsa ang pagpakigtigayon sa Dios.

⁵⁷ Himatikdi, lahi gayud Siya pag maghunahuna. Kita n'yo, pasimang kita nga nagakapadpad, ug kinahanglan gyud nga toohan nato Kini sa *niining* paagi. Ug dayon pag-abot sa Dios uban sa Iyang Pulong nga Iyang gisaad, ug ginapaila ang Iyang Kaugalingon sa nianang Pulong. Ang *kining* grupo dili na makahimo sa pagduol ngadto Niini, tungod kay wala man kini nagatoo Niini. Kita n'yo, giputol na man gud nila ang pagkadugtong nila gikan Niini.

⁵⁸ Sama ni Jose, anak siya ni David, ug usa ka buutan nga tawo, si Jose nga bana ni Maria. Usa siya ka buutan nga tawo, ug dili mailimod nga nagabasa siya og Biblia, ang mga basahong linukot, kanunay, tungod. . . ug nagpaabot sa

Mesias nga moabot, ug nasayod gayud kon unsa ang giingon sa Kasulatan nga mahitabo. Ang giingon ni Isaias, “Usa ka ulay ang magapanamkon.”

⁵⁹ Bueno, karon, niadtong higayona hinigugma niya ang batan-ong dalagang, si Maria, nga anaa sa mga dise-otso ang panuigon, ug siya medyo magwang gamay. Ug niadtong nagkauyon na sila nga magpakasal, nagpakita ang maong dalaga nga buros na diay. Karon daw sa malisod kadto para kang Jose nga mosugot na lang sa niana. Walay duda gisulti na ni Maria kaniya ang pagduaw ni Gabriel. Pero atong namatikdan, iyang kinaiya nga nagagiya kaniya, gidudahan niya kadto.

⁶⁰ Karon nakaplagan nagsabak na siya sa wala pa sila gikasal. Ug, sa Biblia, ang silot niana mao ang kamatayon, pinaagi sa pagbato kaniya. Ang babayeng wala pa gikasal pero nagsabak na, kinahanglan siya nga batohon. Walay prostitusyon sa Israel. Gidid-an kini. Nahibaloan nato, sa Deuteronomio, kini nagsulti sa ato niana.

⁶¹ Karon nahibal-an nato nga, si Maria, mora og gigamit lang niya si Jose aron himoong taming sa buhat nga iyang gihimo. Tungod kay, kon nakaplagan siya nga nagsabak na siya sa wala pa sila naminyo, kung ingon-ana kinahanglan siya batohon, ug nagkinahanglan siya karon sa usa ka tawo nga makabarug ingon nga taming niya. Ug ingon-ana kon tan-awon, sa kinatibuk-an, nga mora’g ingon-niana ang gipaningkamotan niyang buhaton.

⁶² Apan si Jose nga nagatan-aw sa matahum niya nga mga mata, ug nag-ingon si Maria, “Jose, si Gabriel nag-ingon kanako, ‘Ang Balaang Espiritu magakunsad kanimo, ug kining Butang nga pagasamkunon mo—diha kanimo iya sa Balaang Espiritu. Dios kini. Ingon niana ang igatawag Niini, ang “Anak sa Dios.”” Ug, si Jose, gusto niya—niya—niyang toohan kadto, pero lang pagkatalagsaon kaayo kadto. Wala pa mahitabo kana sukad pa kaniadto.

⁶³ Ug kana mao sa gihapon karon. Kon mahimo lang unta nato . . . Kung aduna lang ko’y pamaagi nga mahimo ko ang mga tawo nga makita ang katalagsaon sa unsa man nga butang, kon kini maipaila pinaagi sa Pulong, nan ang mga kinaiyahan niini nagapamatuod kung unsa kini. Kini mao ang Dios nga nagapamuhat.

⁶⁴ Kung nasayran lang unta kadto ni Jose. Nahibaloan unta niyang, “Ang ulay magasamkon.” Pero nagmatinud-anon lang siya bahin niini. Dili niya gusto nga pagabulagan siya, bisan sa hilom, pero siya—siya naghunahuna sa pagbuhat niini.

⁶⁵ Ug unya ang anghel sa Ginoo nagpakita kaniya diha sa usa ka damgo. Nahibulong ba kamo nganong sa damgo Siya nagpakita? Wala ma’y mga propeta niadtong mga adlaw. Ang ilang damgo simpli ra kaayo, wala na nagkinahanglan nga hubaron pa. Ang ingon, “Jose, ikaw nga anak ni David, ayaw

kahadlok sa pagkuha alang kanimo si Maria nga imong asawa, tungod kay ang iyang gisamkon iya sa Espiritu Santo.” Kita n’yo, kung ingon-ana, mao kana’y nagsulbad niini. Kita n’yo, nakigttagbo Siya kaniya diha sa damgo, ikaduhang pamaagi. Apan, nakita ninyo, wala’y propeta kaniadto aron ipaila kadto nga Pulong, nga, “Kini mao ang ulay nga magasamkon.” Kita n’yo? Busa, tungod niini, Siya nagpakita kaniya sa usa ka damgo, tungod kay siya matinud-anon ug matarung ug usa ka buotan nga tawo.

⁶⁶ Ug nagatoo ako nga ang Dios magaabot ngadto sa bisan kinsang buotan nga tawo, sa unsa man nga pamaagi, ug magapaila sa Iyang mga buhat ngadto sa maong maayong tawo, sa maong panahon, kon kana nga tawo tinawag sa Dios sa maong panahon.

⁶⁷ Karon, pagkatalagsaon kadto, halos dili nila kadto masabtan. Pero, sa kanunay, ang maong mga pagpakita nagasubay lamang sa gisaad nga Pulong para sa maong kapanahonan, kining tanan nga pagkatalagsaon.

Karon adunay mga tawo nga manganhi, ug moingon, “Bueno, talagsaon *kini*, Dios gyud *kini*. Pagkatalagsaon *Kini*.”

⁶⁸ Apan, nakita ninyo, kinahanglan *kini* nga maila diha sa Pulong, ug ang Pulong mao ang Dios. Kita n’yo? Ug unya ang mga kinaiyahan niining pagpaila nagapakita kon kinsa *kini*, kay ang Dios nag-ingon, “*Kini* magakahitabo,” ug *kini* nahitabo gayud. Kita n’yo? Kinaiyahan *kini* sa Pulong sa Dios nga napaila pinaagi sa kinaiyahan sa mga nagakahitabo.

⁶⁹ Nag-ingon Siya nga sa katapusan nga mga adlaw Iyang igabubo ang Espiritu Santo. Gihimo Niya *kini*. Ang mga kinaiyahan niini nagpaila nga *kini* iya sa Dios, ang Iyang gisaad nga Pulong. Kita n’yo, kanunay kining nagapaila sa iyang kaugalingon.

⁷⁰ Karon, kanunay, sa tanang panahon, ang pagpamulong ginatul-id, sa diha nga ang Pulong gipamulong nga sayup. Imo bang namatikdan? Sa mga adlaw kadto ni Noe, nga ang maong kapanahonan sa siyensya gibadlong, nga ang Dios magabubo kaniadto og tubig gikan sa kalangitan. Si Moises kadto, kita n’yo, ang nagbadlong sa diha nga silang tanan okey na lang sa pagpuyo didto sa Ehipto, ug uban pa, apan kinahanglan nga ang Pulong sa Dios magaabot aron nga maila gyud. Ug ang Pagkamatuod sa Pulong mao’y magatul-id sa sayup.

⁷¹ Tugoti nga mangutana ko kaninyo og usa ka butang. Magpalawom kita og gamay dinhi. Dili man unta ako magwali’g pagpanudlo o doktrina, pero tugoti nga mangutana ako kaninyo sa usa ka butang.

⁷² Si Jesus mao ang Pulong. Nahibalo kita niana. Ang Biblia nagsulti og ingon niana. San Juan, sa ika-1 kapitulo, “Sa sinugdan mao ang Pulong, ug ang Pulong kauban sa Dios, ug

ang Pulong mao ang Dios. Ug ang Pulong nahimong unod ug nipuyo uban kanato.” Siya sa gihapon mao ang Pulong. Unya sa dihang nahibal-an Niya ang ilang mga hunahuna, nahibaloan na unta nila nga mao na kadto ang Pulong, tungod kay ang Pulong sa Dios nag-ingon nga mao kana ang Iyang pagabuhaton. Siya mao ang Propeta.

⁷³ Karon himatikdi, atong nahibal-an nga sa dihang Siya natawo, og niadtong dose anyos na ang panuigon, miadto Siya sa piyesta sa tabernakulo. Ug sila nangadto didto sa Pasko. Ug, didto sa dalan sa ilang pagpamauli, nga nakagikan na og tulo ka adlaw sa ilang paglakaw ug ila Siyang nabiyaan; sa pagpangagpas, sa paghunahuna, diay, sa pagdahum nga Siya kauban lang sa ilang mga kaubanan.

⁷⁴ Aduna kita’y matun-an gikan niana. Ingon-ana gihapon ang nagakahitabo sa karon! Karon kamong Methodist, Baptist, Presbyterian, Lutheran, Catholic, unsa man kamo, kita n’yo, mao ra sa gihapon ang inyong ginabuhar. Kamo nagadahum nga tungod kay si Wesley naghimo og dakung rebaybal, si Luther nga naghimo og dakung rebaybal, o ang Pentecostes naghimo’g dakung rebaybal, kamo ningdahum mo nga Siya kauban ra sa gihapon sa mga tawo, sa dihang, usahay wala Siya diha.

⁷⁵ Namalik sila sa pagpangita Kaniya. Asa nila Siya nakitan? Kung asa nila Siya gibiyaan, didto sa Jerusalem. Ug sa dihang nakit-an nila Siya, unsa ma’y Iyang ginabuhar? Usa ka gamay’ng bata nga lalaki, dose-anyos lang ang panuigon, siguro wala pa gyud nakaeskuwela gawas sa kung unsa lang ang gitudlo sa Iyang mama Kaniya; ug ania Siya sulod sa templo, nakiglantugi sa mga sacerdote, mahitungod sa Pulong sa Dios. Ug sila nahibulong sa kaalam niining Bataa. Ngano man? Siya man ang Pulong. Karon himatikdi.

⁷⁶ Ug karon dili sa pagdaut kaninyo nga mga Katoliko nga nagtawag kang Maria nga inahan sa Dios, apan tugoti nga akong ipakita kaninyo ang usa ka gamay’ng sayup niini. Kung ang iglesia gitukod nga ang pundasyon mao si Maria, bantayi kung unsay nahitabo. Karon miduol siya ug ang giingon niya, “Oh, ang amahan Mo ug ako nagsige og pangita Kanimo, nga nagpangluha.” Bantayi kana nga pamahayag, gidaut niya kung ingon-ana ang kaugalingon niyang pagpamatuod. Giingon niya, “ang amahan Mo ug ako nagsige og pangita sa Imo, nga nagpangluha.”

⁷⁷ Bantayi kanang Pulong. Siya mao ang Pulong. Miingon Siya, “Wala ba kamo manghibalo nga Ako kinahanglan magapadayon sa mga buluhaton nga iya sa Akong Amahan?” Tan-awa ang Pulong nga ginatul-id ang sayup. Sa atubangan mismo sa mga sacerdote, gidaut ni Maria ang iyang pagpamatuod. Nag-ingon siya kaniadto nga nagsamkon siya pinaagi sa Espiritu Santo, unya karon nag-ingon siya nga si Jose mao ang Iyang “amahan.”

Nakita ninyo nga nasapon kini dayon sa Pulong? Siya mao ang Pulong. Karon, nahibalo kamo nga dose-anyos-ang panuigon nga bata dili makahimo niana. Siya man ang Pulong. Siya mao ang gilitok nga Pulong alang sa maong kapanahonan, busa tungod niini ang maila nga kinaiyahan sa Dios anaa kang Cristo. Gitul-id Niya ang mga sayup. Nag-ingon Siya . . .

Giingon nila, “Aba, mga tinun-an man kami ni Moises.” Kita n’yo?

⁷⁸ Ang ingon Niya, “Kung mga tinun-an kamo ni Moises, nakaila unta kamo Kanako. Nangsulat siya mahitungod Kanako. Ginaingon ni Moises, ‘Ang Ginoo nga inyong Dios magapabarug og usa ka Propeta nga sama kanako.’ Nakaila unta kamo Kanako kon nakaila kamo ni Moises.”

⁷⁹ Ug, kita n’yo, kanunay nga ginatul-id sa Pulong ang sayup sa panahon. Pero ang mga tawo dili gusto motoo niini. Padayon lang sila sa gihapon, mao ra sa gihapon.

⁸⁰ Pero gitul-id ni Jesus ang Kaugalingon Niyang inahan. Ug sayup ang Iyang inahan, kay gipahayag na niya kaniadto nga ang maong Bata gisamkon niya pinaagi sa Espiritu Santo, ug dinhi gibalí niya ang pagpamatuod niya ug ginaingon nga si Jose kono mao ang “amahan,” amahan kono ni—ni Jesus. Karon kung—kung si Jose . . .

⁸¹ Kung anak Siya ni Jose, kung namuhat gyud Siya sa mga butang nga iya sa Iyang amahan, atua unta Siya didto sa balay pandayan.

⁸² Apan namuhat Siya sa mga buluhaton nga iya sa Iyang Amahan, didto sa sulod sa Templo, ginapamadlong kadto nga mga organisasyon. Kita n’yo? Namuhat Siya sa mga buluhaton nga iya sa Iyang Amahan, nga dose-anyos-nga-pangidaron pa lang nga Ulitawhito. “Wala ba kamo manghibalo nga Ako kinahanglan magapadayon sa mga butang nga iya sa Akong Amahan?”

⁸³ Nahimatikdan ba ninyo sa dihang si Jesus gitintal ni Satanas? Ang mga kinaiyahan Niya didto, sa dihang atua Siya didto nga ginatintal Siya, nagpaila kadto nga Siya ang Dios, tungod kay nagpabilin Siya sa Pulong. Kita n’yo? “Nahisulat na,” ang giingon ni Satanas.

Miingon si Jesus, “Nahisulat usab,” nagpabilin mismo sa Pulong.

⁸⁴ “Ang Dios, sa nagkalainlaing mga panahon,” atong mabasa dinhi. “Ang Dios, sa nagkalainlaing mga panahon,” kana mao ang sa kaniadtong panahon, “sa nagkalainlaing mga paagi,” sa daghang pamaagi, “nagpaila sa Iyang Kaugalingon ngadto sa Iyang mga propeta pinaagi sa mga panan-awon.” Mao kana ang kinaiyahan sa usa ka propeta, sa diha nga magsulti siya og mga butang ug kini nagakahitabo. Karon mao kana ang kinaiya

sa iyang pagpaila, nga ang Dios anaa kaniya. Kung ingon-ana, nagahatag kana kaniya og mga katungod sa paghubad sa Pulong alang nianang adlaw, tungod kay, “Ang Pulong sa Dios nagaabot ngadto sa mga propeta,” kinaiyahan sa propeta, nga Iya nang daan gisulti.

⁸⁵ Nag-ingon ang Biblia, “Kon aduna ma’y tawo, ug unsay iyang isulti nagakahitabo, kung ingon-ana mamati kamo kaniya; pero, kung kini dili mahitabo, ayaw pagtoo kaniya, ayaw kahadlok kaniya, pero ang Akong...kon—ang Akong Pulong wala diha kaniya. Apan kon kini nagakahitabo, nan ang Akong Pulong anaa kaniya.” Mao kana ang iyang timailhan. Mao kana ang kinaiyahan sa usa ka propeta.

⁸⁶ Karon, ang Dios, sa nagkalainlaing panahon, sa ingon-anang pamaagi Niya ginapakita ang Iyang kinaiyahan sa pagpaila sa Iyang Kaugalingon ngadto sa tawo, pinaagi sa pagsulti ginamit ang tawo nga tinawag Niya nga mamahimong propeta. Karon, nagaingon ang Biblia nga, “Ang Dios, sa nagkalainlaing panahon, sa nagkalainlaing mga paagi, nakig-estorya sa atong mga amahan pinaagi sa mga propeta.”

⁸⁷ Mabasa usab nato, dinhi sa Ikaduhang Pedro, nga ang kinatibuk-ang Pulong sa Dios gisulat nila. “Kaniadtong mga tawo, nga minandoan sa Espiritu Santo, misulat sa Biblia.” Mga propeta sila. Ang Pulong nagaabot ngadto kanila ug ilang gisulat Kini, gisulat kini, ilalum sa inspirasyon. Una silang nailhan nga mga propeta, dayon sila—sila nagsulat sa Pulong nga adunay inspirasyon, ug anaa kanila ang interpretasyon sa Langitnong kapadayagan tungod kay ang Dios kadto nga anaa sa tawo.

⁸⁸ Karon sa ingon-anang pamaagi Niyang gipakita ang Iyang Kaugalingon diha sa Iyang kinaiyahan sa pagpaila, mga panan-awon nilang gipamatud-an, mao’y kinaiyahan sa Dios diha kanila, nga ginapaila ang Iyang Kaugalingon ngadto sa mga tawo.

⁸⁹ Karon, mao kana ang bugtong paagi nga anaa Siya kang Cristo. Ang propeta usa ka diyutay’ng lugas lamang. Si Cristo mao ang kinatibuk-an sa pagka-Dios. Ug ang Dios anaa diha kang Cristo, nga ginapasig-uli ang kalibutan ngadto sa Iyang Kaugalingon. Ug ang Iyang mga kinaiyahan nagpaila Kaniya, kung unsa Siya, nga tungod niini nag-ingon Siya, “Kung wala Ko ginabuhat ang mga buhat sa Akong Amahan, kung ingon-ana ayaw Ako tohi. Kung wala Kanako ang kinaiyahan sa Akong Amahan, nan ayaw ninyo Ako tohi, ayaw’g too sa Akong mga ginapahayag. Kung wala Kanako ang kinaiyahan sa Akong Amahan, nan ayaw ninyo kini og tohi, man lang.”

⁹⁰ Karon, ang Iyang mga kinaiyahan wala nagausab. Dili mahimong usabon sa Dios ang Iyang kinaiyahan, pareho sa usa—usa—usa ka karnero nga dili pud makausab sa iyang kinaiyahan, o ang bisan unsang butang dili makahimo sa pag-usab sa ilang

mga kinaiyahan. Tungod kay, samtang kini anaa sa iyang pagka-orihinal, kini orihinal. Ug kung aduna ka'y usabon niini nga bisan unsa man, nan imo kining giusab gikan sa iyang pagka-orihinal.

⁹¹ Sama ra kini nga mokuha ka og usa—usa ka baboy, ug mahimo mong ligoan ang maong baboy ug—ug manikyuran mo ang iyang mga kuko, sama sa ginabuhat sa mga babaye, ug lipstikan kini, ug sul-oban kini og maanindot nga bisti. Buhii dayon ang maong baboy, mobalik kini diretso ngadto sa lunangan, ug maglunang pag-usab. Ngano man? Baboy man siya, mao lang kana. Apan, ug, pero, nahibalo kamo, dili nimo mahimong. . .

⁹² Ang karnero dili makahimo niana. Dili gani siya motamak nianang pita. Ayaw niyang aduna siya'y bisan unsa man nga kahilambigitan niana. Kinaiyahan niya kini. Kita n'yo? Mahimo mo siyang sul-oban og pareho nga klase nga bisti, pero siguradong dili siya, siguradong dili gayud siya moadto didto. Dili importante ang gawas; ang sulod ang importante. Karon, ang Dios nga mao'y tinubdan sa tanang kinabuhi. . .

⁹³ Ayaw pakyasa ang pagkuha niini. Ginapaninguhaan ko, sa tanan nga ania kanako, nga maipakita kaninyo ang usa ka butang. Kita n'yo? Alang kini sa inyong kaayohan, mga higala. Kini para sa inyong ka—kaugalingon. Kita n'yo?

⁹⁴ Wala ako mianhi dinhi aron magpakita lang. Wala ako mianhi, tungod nga wala na'y lain adtoan. Mianhi ako tungod gibati ko gayud ang pag anhi. Nabati ko nga ang buluhaton sa Ginoo nga gihatag kanako kinahanglan maipakita sa mga tawo dinhi, ug nagapaninguha ako nga maipakita kaninyo kung unsa gayud ang Dios sa karon. Siya mao ang gisaad Niya nga Pulong. Siya sa kanunay mao ang Pulong, ug Iyang ginapaila ang Iyang Kaugalingon pinaagi sa kinaiyahan nga Iyahang gisaad. Usa ka kinaiya nga motungha sa usa ka tukmang panahon, nga anaa sa Pulong, dayon ang kinaiyahan niining maong tawo nga ginapaabot nga magatungha mao'y magapaila nga kana mao na nga tawo.

⁹⁵ Mao kana ang rason nga si Jesus kinahanglan mamahimong mao gayud Kung unsa Siya. Nakita unta nila kini. Dili ikatingala nga mga buta sila. Ang butang. . . Giingon, nga bisan tuod Siya namuhat og daghang mga milagro, bisan pa niana dili sila makatoo, tungod kay nag-ingon si Isaias, “Aduna sila'y mga mata ug dili makakita, ug mga dalunggan ug dili makadungog.” Kita n'yo? Sa matag panahon, dili lang sa Iyang panahon; kondili sa matag panahon, kung unsa nga, “Ang Dios, sa nagkalainlaing mga panahon, sa nagkalainlaing mga paagi,” sa gihapon dili nila kini makuha.

⁹⁶ Karon, ang Iyang kinaiyahan wala gayud nagakapakyas. Sa kanunay kini mao sa gihapon. Karon, hinumdumi, ang Iyang

kinaiyahan, ang kinaiyahan sa Dios, dili mahimong mapakyas. Kung mapakyas man, nan napakyas ang Dios. Ug ang giingon sa Biblia, diha sa Mga Hebreohanon 13:8, nga, “Si Jesus Cristo mao sa gihapon kaniadto, karon, ug hangtud sa kahangturan.” Kung ingon-ana, Siya ang dili mausab nga Dios. Kung unsa man ang kinaiya Niya kaniadto sa sinugdanan, Siya mao ra sa gihapon ang maong kinaiya. Sa matag pagpamuhat Niya, sa matag higayon nga aduna Siya’y ginabuhat og unsa man, ginabuhat Niya kini sa mao ra gihapon nga paagi sa matag higayon. Kay kung dili man, nausab ang Iyang kinaiya, kita n’yo, ug magapakita ang Iyang mga kinaiyahan nga dili na Dios. Kita n’yo? Busa dili na nato matino kung asa . . .

⁹⁷ Sama sa giingon ni Pablo, “Kung ang trumpeta nagahatag og dili matino nga tingog, kinsa man ang makahibalo sa pagpangandam alang sa gubat, kung ang trumpeta nagahatag og dili matino nga tingog?” Karon kung ang trumpeta motingog og “atras,” mao kana ang kinahanglan natong buhaton, ang moatras. Kung ang trumpeta motingog og “sulong,” mao kana ang kinahanglan natong buhaton, ang mosulong. Apan unsa man ang Trumpeta? Ang Pulong sa Dios. Ginapaila niini ang Dios, kon ugaling kini—kon motingog kini ugaling og “saka, lingkod, atras, iandam na ang armas,” unsa man kini. Tingog kini sa Trumpeta sa Dios.

⁹⁸ Ug ang usa ka dili matino nga tingog, sa diha nga ang Biblia nag-ingon na nga adunay butang nga magakahitabo; ug usa ka tawo ang moingon, “Oh, para man sa nangaging panahon na, kana.” Mao kana ang dili-matino nga tingog dinha. Kung ingon-ana wala ka kahibalo unsay buhaton.

⁹⁹ Miingon si Jesus, “Aduna Ako’y kagahum sa pagtugyan sa Akong kinabuhi ug ang pagbangan niini pag-usab.” Wala gyuy dili matino nga tingog dinha.

¹⁰⁰ Ang babaye miingon, “Nahibalo kami nga ang Mesias magaabot; ug pagmoabot na Siya, Siya magasulti kanamo sa mga butang pareho sa Iyang gihimo.”

¹⁰¹ Miingon Siya, “Ako mao Siya.” Dili maingon nga dili matino nga tingog kana. “Ako mao Siya.” Uh-huh! Amen.

Nanag-ingon sila, “Ang among mga ginikanan nagkaon og tinapay didto sa kamingawan.”

¹⁰² Miingon Siya, “Silang tanan, ang matag usa kanila, nangamatay man.” Miingon Siya, “Apan Ako mao ang Tinapay sa Kinabuhi nga nagagikan sa Dios gikan sa Langit.” Dili maingon nga dili kana matino nga tingog. “Ako mao ang Kahoy sa Kinabuhi, gikan sa tanaman sa Eden.” Dili, walay dili matino nga tingog dinha. Wala gayud. Walay unsa man nga dili matino niini. Sigurado gyud Siya sa matag butang nga Iyang ginahimo.

¹⁰³ Wala nagahatag ang Biblia og dili matino nga tingog. Ginapaila niini ang kinaiyahan sa Dios sa pagtingog niini.

104 Nag-ingon si Jesus, sa San Juan 10:37, “Kung wala Ako magbuhat sa mga buhat sa Akong Amahan, unsay . . . ug nga wala Kanako ang kinaiya sa Akong Amahan, nan ayaw pagtoo Kanako. Sila mao ang, sila nagapaila sa Iyang kinaiya diha Kanako, ang Iyang mga kinaiyahan.”

105 Tungod, ang Amahan mao ang Pulong, “Sa sinugdanan mao ang Pulong, ug ang Pulong kauban sa Dios, ug ang Pulong Dios,” ug makita ang kinaiyahan sa Dios pinaagi sa Iyang saad alang nianang kapanahonan.

106 Karon kung nabuhi Siya sa panahon ni Moises, wala unta kini molampos. Ug kung si Moises pud ang nabuhi sa Iyang panahon, wala unta kini molampos. Kon Siya nabuhi sa panahon ni Noe, wala unta kini molampos, o kaha kung si Noe naman ang nabuhi sa Iyang panahon. Nagpropesiya si Noe sa mga butang kaniadto alang niadtong adlaw, ug ang iyang kinaiyahan ug ang iyang gibuhat mao’y nagpaila kaniya diha sa Pulong sa Dios. Mao usab ang gibuhat ni Moises.

107 Ug ania si Jesus nga miabot, ug ang Pulong nga gisaad alang niadtong panahon maila diha kang Jesus Cristo tungod sa kinaiyahan sa maong Pulong, nga mao ang Dios. Amen.

108 Ang pagbubo sa Espiritu Santo, sa katapusang mga adlaw, ngadto sa yano lang nga mga tawo, nagpaila sa kinaiyahan sa Dios diha sa mga tawo. Gisaad Niya kini. Pulong kini. Nag-ingon Siya nga buhaton Niya kini. Walay makabakwi niini. Nag-ingon Siya nga buhaton Niya kini.

109 Busa ang tanan niining mga butang nga Iyang gisaad, Iya kanang ginabuhat. Kini ang nagapaila sa Iyang kinaiyahan. Oo, sir. “Ayaw toohi kini, ayaw toohi kining Akong ginapanulti, kon kining Akong kinaiyahan dili sa Dios.”

110 Karon himatikdi diha sa Juan 14:12, “Siya nga nagatoo Kanako,” ang ingon Niya, “adunay Akong timailhan, adunay Akong kinaiyahan. Siya nga nagatoo Kanako, ang mga buhat nga Akong ginabuhat pagabuhaton usab niya.” Nagapaila kana nga ang kinaiya ni Cristo anaa kaniya, nga ginapakita ang Iyang mga kinaiyahan. Amen.

111 Ako nang gibati ang pagkarelihiyoso gayud karon, bisan pagaw na ako. Oo, sir. Oh, my! Kita n’yo, wala gyud sayup bahin Niini! Ang Iyang Kinabuhi! “Ang nagatoo Kanako, ang mga buhat nga Akong ginabuhat iya usab pagabuhaton.” Kita n’yo, kana ang nagapaila sa maong kinaiyahan.

112 Mao usab ang Iyang giingon: “Kon ang Akong kinaiya wala nagapaila sa Akong Kaugalingon,” nga ang Dios anaa—anaa Kaniya, nan Siya . . . ayaw ninyo Siya’g toohi. Karon, giingon Niya usab nga Siya maipaila niana. Bueno, kung ingon-niana, kung wala Siya ginapaila niini, nan dili Siya mao kung unsa ang ginasulti Niya.

113 Ug, karon, kung si Cristo wala nagapaila sa Iyang Kaugalingon, nga ang kinaiyahan ni Cristo maila diha kanato ingon nga iya ni Cristo, nagatoo sa Pulong... si Jesus mao ang Pulong, busa kinahanglan Niyang toohan ang Pulong. Ug unsaon nato pag-ingon nga kita Iya ni Cristo, ug isalikway ang unsa man nga Pulong nianang Biblia? Ang Balaang Espiritu ni Cristo mao ang Dios diha kanimu, ug ginatubokan Niini ang matag saad inubanan og “Amen.” Nag-ingon ang Biblia, “Kini nga mga ilhanan maganunot kanila nga nagatoo.” Miingon ang Espiritu sa Dios, “Amen.” Kita n’yo?

114 Walay bisan usa kanila ang nagaingon, “Dili, para man kana sa uban nga kapanahonan kaniadto; para ra man na sa mga tinun-an kaniadto.”

115 “Panlakaw kamo sa tibuok kalibutan ug iwali ang Maayong Balita ngadto sa tanang binuhat. Siya, bisan asang dapita sa kalibutan, nga magatoo, kini nga mga ilhanan maganunot kaniya, ang mao ra nga butang.” “Ang mao sa gihapon kagahapon, karon, ug hangtud sa kahangturan,” ang maong kinaiyahan nga maila.

116 Ginahimo niana ang Mga Hebreohanon 1:1, “Ang Dios sa nagkalainlaing panahon, nakig-estorya sa atong mga ginikanan pinaagi’g mga propeta,” nga ginapaila si Cristo karon, ingon nga nabanhaw, tungod sa mao ra nga mga kinaiyahan nga Iyang ginahimo sa nagkalainlaing kapanahonan. Nahimatikdan ba ninyo? Ang Dios wala gayud nagausab sa Iyang pamaagi.

117 Diha sa daan nga Biblia, pag-modamgo ang usa ka magdadamgo, ug walay propeta sa kayutaan aron tan-awon kung kining damgo husto ba o dili, aduna sila og ubang pamaagi aron sa pagsusi. Dad-on nila kana nga tawo, kung kinsa man kadtong midamgo, dad-on nila siya ngadto sa templo. Ang tabon-sa-dughan ni Aaron, nga siya ang labaw’ng sacerdote kaniadto, ginabitay kini didto sa haligi. Ug isaysay sa nagdamgo kadto nga damgo. Bisin unsa pa kadto ka maanindot paminawon, unsa pa kadto katinuod paminawon; kung walay supernatural nga Kahayag nga mosiga niadtong mga bato, nga gitawag og Urim Thummim (nasabtan kini sa mga nagabasa sa Biblia); dayon, dili ko igsapayan kung bisin unsa pa kadto katinuod paminawon, dili gayud tinuod. Ang pagkadilikasagaran sa Dios, ang kinaiya sa Dios, kinahanglan nga maipasundayag ang mga kinaiyahan Niya diha sa supernatural, aron maipakitang ginapaila Niya ang Iyang Kaugalingon diha sa maong mensahe. Amen.

118 Mao sa gihapon ang ginasulti ko karong gabhiona. Wala na ang karaang Urim Thummim, apan ang Pulong mao sa gihapon ang butang nga nagapaila sa kinaiyahan sa Dios, ang saad alang sa panahon nga atong gikinabuhian. Ania ang mga kinaiyahan sa Dios nga ginapaila pinaagi sa maong saad alang sa panahon nga atong gikinabuhian.

¹¹⁹ Mao kana ang nagapahimo sa Dios ingon nga mao ra sa gihapon kung unsa Siya kaniadto. “Nga sa nagkalainlaing panahon,” tan-awa ninyo, “sa nagkalainlaing mga paagi, nagpakigsulti Siya sa atong mga ginikanan pinaagi sa mga propeta.” “Ug ang kasugoan ug ang mga propeta milungtad hangtud sa pag-abot ni Juan; sukad niadto, ang Gingharian sa Langit.” Himatikdi, “Apan sa niining kaulahiing adlaw,” nga nagasulti sa mao ra nga butang nga ginahimo Niya kaniadto, “pinaagi sa Iyang Anak nga si Cristo Jesus.” “Ang Dios, nga sa nagkalainlaing panahon, sa nagkalainlaing mga paagi, nagpakig-estorya sa atong mga ginikanan pinaagi sa mga propeta; sa niining kaulahiing adlaw,” nga ginahimo ang mao ra nga butang kaniadto, “nagapakig-estorya ngadto sa mga tawo (sa mga ginikanan) pinaagi sa Iyang Anak nga si Cristo Jesus.” Gibanhaw Siya gikan sa mga patay, ug Siya nagapuyo sa sulod kanato, nga ginapaila ang Iyang Kaugalingon ug nagasulti kanato og mga butang nga mahitabo pa lang, nga Siya nagatugkad sa mga hunahuna ug sa mga katuyoan sa kasingkasing. Si Jesus Cristo nga mao sa gihapon kagahapon, karon, ug hangtud sa kahangturan! “Ang Dios, nga sa nagkalainlaing mga panahon ug nagkalainlaing mga paagi nagpakig-estorya sa atong mga ginikanan pinaagi sa mga propeta, apan sa niining kaulahiing adlaw pinaagi ni Jesus Cristo nga Iyang Anak.” Dili gayud mahilabtan ang Kasulatan. Eksakto gayud.

¹²⁰ Maingon sa gikaingon ko na kaniadto, dili kinahanglan sa Dios ang si kinsa man nga maghubad niining Pulong. Siya mismo ang nagahubad sa Kaugalingon Niyang Pulong. Pagmosulti Siya og unsa man nga butang, nagakahitabo kini, mao kana ang interpretasyon. Kita n’yo? Wala Siya nagkinahanglan kang kinsa man nga moingon, “Bueno, nagatoo ko nga *ingon niini* ang kahulogan niini.” Ang Dios nagapaila niini pinaagi sa Iyang Kaugalingong interpretasyon.

¹²¹ Mao’y, kon ang saad alang gayud nianang adlaw, dili mahimo nga kita magkinabuhi diha sa kahayag ni—ni—ni Luther, dili mahimo nga kita magkinabuhi sa kahayag ni Wesley, dili mahimo nga kita magkinabuhi sa kahayag ni bisan kinsa kanila. Kinahanglan kita magkinabuhi sa Kahayag nga gisaad para sa karon nga panahon.

¹²² Unsa kaha kung miadto si Moises didto sa Ehipto, ug miingon, “Bueno, magahimo kita og usa ka dakung arka. Ato kining ipalutaw pagawas niining nasud. Moawas ang Nile”? Kung tan-awon nila ang nasulat sa basahon nga linukot; walay saad nga ingon niana. Husto kana. Apan, nakita ninyo, napaila niya ang iyang kaugalingon ingon nga propeta sa Dios, tungod kay kon unsa ang iyang gisulti nangahitabo, ug dinha nila nahibaloan nga anaa kaniya ang Pulong sa Ginoo. Si Faraon adunay mga bangkaw, apan si Moises adunay Pulong. Busa sa

diha nga ningtagbo sila sa dagat, ang tanang mga bangkaw nangalunod sa dagat; ug naipatabok ni Moises ang Israel latas sa dagat, diha sa uga nga yuta, tungod kay anaa kaniya ang Pulong, ug siya mao ang Pulong niadtong panahona. Si Moises mao ang Pulong nga naipadayag niadtong taknaa.

Si Elias mao ang Pulong kaniadto nga naipadayag alang niadtong taknaa.

¹²³ Si Cristo mao ang Pulong nga naipadayag, ug ang maong mga saad nga Iyang gisaad. “Hamubo na lang nga panahon ug ang kalibutan dili na makakita Kanako; apan kamo makakita ra unya Kanako, tungod kay Ako makig-uban kaninyo, bisan sa sulod ninyo, hangtud sa katapusan sa kalibutan. Ang mga buhat nga Akong ginabuhat pagabuhaton usab ninyo.” Siya nagsaad niining mga butanga. Unsa man kini? Kini ang mga kinaiyahan sa Dios nga ginapasundayag ang Iyang Pulong, sama sa Iyang gihimo sa tanan nga kapanahonan.

¹²⁴ Sa Malaquias 4, miingon Siya, “Sa dili pa moabot ang daku ug makalilisang nga adlaw sa Ginoo, ania karon, Akong ipadala kaninyo si Elias nga propeta; ug iyang ipasig-uli ang pagtoo sa mga anak balik sa mga amahan pag-usab, sa dili pa kanang adlawa magaabot.” Iyang gisaad kini.

¹²⁵ Miingon si Jesus, sa ika-17 nga kapitulo ni San Lucas, “Maingon sa nahitabo kaniadto sa mga adlaw sa Sodoma, maingon man usab unya sa pag-abot sa Anak sa tawo, sa diha nga ang Anak sa tawo igapadayag.” Sa diha nga ang maong pagpadayag mabuklad ra sa iyang kaugalingon, sa mga adlaw nga ang kalibutan mapareho na sa Sodoma, unsa ma’y mahitabo? Ang kinaiyahan sa maong Kasulatan nagakatuman na. Ang Dios nga ginapaila ang Iyang Kaugalingon pinaagi sa Iyang kinaiyahan, mga kinaiyahan nga Siya mao na sa una pa. Dili niya mabiyaan kana.

¹²⁶ Sa kaulahiing mga adlaw, nagpaila Siya pinaagi sa Iyang Anak. Himatikdi kung ginaunsa sa Dios pagbuhat niini nga sa una pa ang... ingon nga Siya sa... Wala Niya gayud ginausab ang Iyang pamaagi.

¹²⁷ Kadtong tulo ka tawong nakig-estorya kang Abraham, sama sa ato nang nahisgotan dinhi kaniadto, sa mga adlaw sa Sodoma.

¹²⁸ Si Abraham usa ka tawo nga nagatoo sa Dios. Gitooan niya ang Dios sa Iyang saad. Si Sarah, nga iyang asawa, saysenta’y-singko na ang katigulangon, si Abraham usab setenta’y-singko na, niadtong gitawag siya sa Dios. Miingon ang Dios nga makabaton sila og usa—usa ka anak; makabaton si Abraham og usa ka bata kang Sarah. Mora og kataw-anan pamation, apan mahunahuna ko si Sarah nga ginaandam na niya ang tanan niadtong—niadtong gamay’ng sapatos sa bata ug mga perdible, ug ang tanan na, giandam, tungod kay makabaton na sila niining gamay’ng bata.

129 Human sa unang baynte-otso ka adlaw, aba, siguro gipangamusta ni Abraham si Sarah, “Kumusta ang imong gibati, langga?”

“Wala pa ma’y kausaban.”

“Himaya sa Dios, maangkon nato kini, sa gihapon.”

“Giunsa mo man sa pagkahibalo?”

“Mao man ang giingon sa Dios.”

Usa ka tuig ang milabay. “Kumusta ang imong gibati, mahal?”

“Wala pa ma’y kausaban.”

“Maangkon nato kini, sa gihapon. Mao man ang giingon sa Dios.”

Lima na ka tuig ang milabay. “Kumusta na karon ang gibati mo, mahal?”

“Wala pa ma’y kausaban.”

“Maangkon nato kini, sa gihapon. Mao man ang giingon sa Dios.”

130 Unsa man kadto? Aduna siya’y saad sa Dios. Nagtoo siya sa Dios, ug naggawi siya nga mora og Dios: gikuptan niya ang gisaad nga Pulong. Kini. . .

131 Milabay ang baynte-singko ka tuig. Ang mga gagmay’ng sapatos nandalag na, apan gihipos niya gihapon kini. Karon tigulang na si Abraham, ug nagkabakò na, ug lain na ang iyang panglawas; ug ang tagoangkan ni Sarah sama sa patay na, ug baog usab si Abraham. Ug grabe na ang ilang kahintang!

132 “Kumusta man ang imong gibati, Abraham, amahan sa mga nasud?” ingon sa mga higala niyang nagpaaron-aron nga mga magtotoo ngadto kaniya.

133 “Bueno, himaya sa Dios, maayo akong gibati. Makaangkon gyud kami og anak, bisan unsaon pa.” Tungod kay wala siya nagduhaduha sa saad sa Dios pinaagi sa pagka dili-matinoohon; kondili nagmakusganon pa, nga nagadayeg sa Dios, kay siya bug-os nakasigurado nga kung unsa man ang gisulti sa Dios, mahimo sa Dios nga tumanon. Amen. Ingon niana ang kinaiyahan sa usa ka magtotoo.

134 Unsa na man ikaw? Kita n’yo? Unsa na man kita, nga mga anak ni Abraham? Nailhan ba kita uban sa Pulong sa Dios, ingon nga saad, ug ang atong kinaiyahan nagapaila kanato, nga kita nagatoo gyud Niini? O, nagaatras-abante ka, molukso gikan *dinhi*, ug paingon *dinhi*, ug *dinhi* na usab, ug manalagma, ug magpanuko, bahin Niini? Kung ingon-ana, dili kita mga Cristohanon, nagpatoo-too lang kita.

135 Apan, sa dihang kita nagabarug gyud nianang saad, biraha kini dayon ug magpabilin Niini! Gibuhat kana ni Abraham.

¹³⁶ Karon nahibaloan nato, nga usa ka adlaw niadto nakita niya ang tulo ka tawo nga nagsingabot, nagapaingon. Ang Biblia nag-ingon dinhi, “Usa kadto ka mainit nga adlaw,” mga kaudtohon tingali. Miduol kini nga mga tawo ug nakig-estorya kaniya. Atong nasabtan nga ang duha kanila nagpadayon paingon sa Sodoma. Nagtoo ko nga nahisgotan nato kini sa miaging gabii. Ang usa kanila nagpabilin kaniya.

¹³⁷ Tan-awa kini nga Tawo nga iyang gitawag... nga nagpabilin uban niya, unsa ang gihimo sa maong Tawo. Tawong nagpaila sa Iyang kinaiyahan, nga Siya mao si Elohim.

¹³⁸ Elohim, ang pinakauna nga pulong sa Biblia, “Sa sinugdanan ang Dios...” Karon, bisan kinsa kaninyo nga mga eskolar nahibalo nga ang pulong nga *Dios* dinha nagapasabot, sa Hebreohanon, og “Elohim,” nga ang buot ipasabot, “ang labaw’ng Makagagahum, ang nag-inusarang may-kasarang, ang nagalungtad-sa-kinaugalingon,” wala nanginahanglan og tabang gikan ni bisan kinsa, wala nanginahanglan og interpretasyon ni bisan kinsa; nagapamuhat nga Siya Ra. Siya nga mao ang nag-inusarang may-kasarang nga Dios, anaa sa tanang dapit, nahibalo sa tanang mga butang, makagagahum sa tanan. Siya mao ang Dios.

¹³⁹ Atua Siya. Ug karon si Abraham, kining patriarka nga nagahupot sa Pulong, gitan-aw niya kining Lalaki. Ug samtang kining Lalaki nakatalikod Siya niadtong balongbalong, nag-ingon Siya, “Asa man ang imong asawa nga, si Sarah?”

Miingon, “Anaa siya sulod sa balongbalong, sa Imong luyo.”

¹⁴⁰ Miingon, “Pagaduawon Ko ikaw pagmoabot na ang panahon, ug maangkon ninyo kini nga anak nga gisaad Ko kaninyo.”

¹⁴¹ Ug gikataw-an kadto ni Sarah. Ug ang Kadtong nagapakig-estorya kang Abraham, nagsulti kaniya kon unsa ang giingon ni Sarah sa sulod niadtong balongbalong, sa luyo Niya.

¹⁴² Karon, sa Genesis, mabasa ninyo kana. Nahibaloan nato dayon nga niadtong, si Abraham, human nga napaila niadtong Lalaki ang Iyang Kaugalingon...

¹⁴³ Unsa man kini? Mga Hebreohanon, ika-4 nga kapitulo, sa ika-12 nga bersekulo, nag-ingon, “Ang Pulong sa Dios labi pang mahait, mas gamhanan kay sa espada nga duhay-sulab, motugkad sa mga hunahuna ug mga katuyoan sa kasingkasing.”

¹⁴⁴ Naila niya nga kini na ang maong Lalaki. Nahibalo siya nga wala na’y uban pang propeta didto sa yuta gawas lang kaniya, ug busa ang Pulong sa Ginoo siguradong moabot kaniya. Ug siya mao ang propeta, ug ania ang Pulong nga nagaabot sa propeta.

¹⁴⁵ Ingon niana usab kaniadto kang Juan Bautista. Walay propeta kaniadto sulod sa upat na ka gatus ka tuig. Mahinumduman ko...

146 Mahimong ania nagalingkod dinhi si beteranong Doctor Davis, karong gabhiona, ang beteranong magwawali sa Missionary Baptist nga nagbautismo kanako sa Pagtoo. Kaniadto kanunay niya kining ipangatarungan kanako. Miingon siya, “Billy, bata ka pa. Kinahanglan maminaw ka kanako.”

Ingon ko, “Sige, Igsoong Davis, nagapaminaw ako.”

147 Miingon siya, “Nakita mo, si Juan kaniadto wala nabautismohan. Unya nagapangbautismo siya, apan siya mismo wala nabautismohan; wala man gyu’y takus nga magbautismo kaniya.” Maayo kana nga teolohiya sa Baptist. “Ug ania miabot si Jesus, ug nag-ingon didto...miingon si Juan, ‘Ako ang nagkinahanglan nga pagabautismohan Nimo; nganong Ikaw na hinoon ang mianhi kanako?’ Ug miingon Siya, ‘Itugot lang kini karon.’” Miingon siya, “Ug unya sa dihang ‘mitugot’ na lang siya Kaniya,” miingon, “nakita mo, gibautismohan dayon ni Jesus si Juan. Ug paghaw-as Niya sa tubig, unya naabli ang langit ug nakita Niya ang Dios sa porma nga salampati, nga mikunsad ug mianha Kaniya, nag-ingon, ‘Kini ang Akong Anak nga pinalangga, nga Kaniya Ako adunay kalipay nga mopuyo.’” Apan, dili, dili sa pagsupak kang Doktor Davis, pero sayup siya niana.

148 Kita n’yo, si Juan mao ang propeta, ug sa kanunay nagaabot ang Pulong ngadto sa propeta. Busa sa dihang ang Pulong nahimong unod, siguradong didto Kini sa propeta moadto, bisan unsaon; kay, siya ang nagapanghimatuud sa Pulong, ug ang mismong kinaiyahan niya ang nagpaila kaniya nga ingon niana. Ania ang Pulong nga nagaabot, karon unsa’y nahitabo? Sa pagduol niya mismo sa atubangan ni Jesus, ang ingon ni Juan, “Ako ang may kinahanglan nga Imong pagabautismohan; ngano man nga Ikaw na hinoon ang mianhi kanako?”

149 Miingon si Jesus, “Itugot lang kini karon, kay angay kanato ang pagbuhat (gikinahanglan nato) niini aron sa pagtuman sa tibuok pagkamatarung.” Si Juan ingon nga propeta; Siya usab ingon nga Pulong. Siya mao ang Halad, ug pasulod na Siya kaniadto sa Iyang pangyutan-on nga ministerio, ug ang Halad kinahanglan nga mahugasan sa dili pa kini maipresentar. Ug gibautismohan Siya ni Juan, kay nasayod siya. “Itugot lang kini karon, kay angay kanato ang pagbuhat niini aron sa pagtuman sa tibuok pagkamatarung.” Ang Halad kinahanglan nga mahugasan sa dili pa maipresentar, ug busa gibautismohan Siya ni Juan. Dili nga si Jesus mao ang nagbautismo kaniadto kang Juan. Si Juan ang nagbautismo kaniadto kang Jesus. “Itugot lang kini karon.”

150 Himatikdi, ania si Abraham, ug anaa kaniya ang Pulong sa Ginoo. Nagaabot kaniya ang Pulong sa Ginoo. Siya ang propeta. Ug karon ania ang Pulong nga nagaabot. Gitawag Niya siya nga, “Abraham,” dili *Abram*.

151 Pila ka mga adlaw sa wala pa kadto, ang iyang ngalan si Abram—si Abram pa, apan karon Abraham na. Ang iyang asawa si Sari, karon nahimo na og “Sarah,” dili S-a-r-r-a; S-a-r-a-h. Dili (A-b-r-a-h-a-m) A-b-r-a-m, kondili A-b-r-a-h-a-m, Abraham.

152 Ug kining maong Lalaki gipaila Niya ang Iyang Kaugalingon, sa dihang miingon Siya, “Abraham!” Oh, my!

Ingon ni Abraham, “Elohim!”

153 Atua didto ang Pulong ug ang propeta, nga nagkauban, napaila ang maong duha ka kinaiya.

154 Si Elohim, miingon Siya, “Hain man ang imong asawa, nga si Sarah?”

155 Miingon, “Anaa siya sa sulod sa balongbalong, sa Imong luyo.” Ug ang... Dayon nahitabo kadto nga milagro. Elohim! Gitawag Siya ni Abraham nga, “ang nag-inusarang may-kasarang, Makagagahum-sa-tanan, ang Dios nga gamhanan sa tanan.”

156 Miingon si Jesus, sa dinhi pa Siya kaniadto sa kalibutan, gihimo Niya ang mao rang butang nga gihimo kaniadto ni Elohim. Mao kadto ang nagpaila sa Iyang kinaiyahan ingon nga Dios.

157 Ug ang giingon Niya, kaniadto, “Sa kaulahiang mga adlaw, sa pag-abot sa Anak sa tawo, sa dihang Siya igapadayag na, ang ingon niana nga eksena mahitabo pag-usab, maingon kaniadto sa Sodoma.” Si Elohim nga anaa sa taliwala sa Iyang katawhan, ang Dios nga Makagagahum-sa-tanan! Mao kana ang ginaingon sa Kasulatan. Si Elohim nga anaa sa taliwala sa Iyang katawhan!

158 Sulod sa kuwarenta na ka katuigan nga ginabautismohan Niya kita sa Espiritu Santo, si Elohim, ang Dios! Ug ang Iglesia...

159 Tan-awa ninyo, nakita ni Abraham ang usa ka ilhanan, usa usab ka pagtawag; usa ka ilhanan, usa ka pagtawag; usa ka pagtawag, usa ka ilhanan; sa pagpaabot sa gisaad nga anak. Apan ang kaulahiang ilhanan nga iyang nakita, ang kaulahiang pagpakita, ang kaulahiang pagduaw sa Dios sa wala pa miabot diha sa eksena ang gisaad nga anak, mao si Elohim nga anaa diha sa tawhanong lawas. Dayon miabot ang gisaad nga anak.

160 Ug ang Binhi ni Abraham nagapaabot alang sa gisaad nga Anak, si Jesus Cristo. Ug nakita na nila ang mga ilhanan, ang pagbubo sa Espiritu Santo, ang mga pagsulti sa laing mga pinulongan, ang Balaanong mga pagpang-ayo, ug uban pa. Apan pag-igapadayag na ang Anak sa tawo, si Elohim magabalik na usab ngadto sa harianong Binhi ni Abraham ug igapasundayag ang mao rang butang nga gipasundayag Niya sa kaniadto.

panahon, amen, si Elohim, maingon sa gihapon kaniadto! Ngano man? Kini mao ang kinaiyahan sa Dios.

¹⁶¹ Karon, kung si Cristo ang Dios, “Apan sa dili madugay ug ang kalibutan dili na makakita Kanako; apan kamo makakita ra Kanako, tungod kay Ako magauban man kaninyo, bisan sa sulod ninyo, hangtud sa pagkatapos, hangtud sa katapusan. Ang mga buhat nga Akong ginabuhat buhaton ninyo usab.”

¹⁶² Giingon kana ni Jesus sa—sa Lucas, sa ika-17 nga kapitulo. Sige, sa diha nga motoo kita ug makita kini sa kaulahiang mga adlaw, kini nga kahintang mamahitabo pag-usab.

¹⁶³ Busa, sa Mga Hebreohanon 1:1, “Ang Dios, sa nagkalainlaing panahon pinaagi sa mga propeta ginapaila ang Iyang Kaugalingon, sa niining kaulahiang mga adlaw ginapaila ang pagkabanhaw sa Iyang Anak gikan sa mga patay,” pinaagi sa paghatag sa Iglesia sa mao rang kinaiyahan nga anaa Kaniya, nga ginahimo ang Mga Hebreohanon 13:8 og eksakto gayud.

¹⁶⁴ Walay mga balhibo nga maibot gikan niana. Kana mao ang mga balhibo sa agila. Sila nagapabilin nga malig-on, tungod kay sila langitnong langgam. [Blangko nga bahin sa teyp—Ed.] . . . iya sa agila nga pagkaon ang ilang ginakaon.

¹⁶⁵ Karon atong makita nga, “Sa nagkalainlaing panahon, sa nagkalainlaing pamaagi, Siya nakig-estorya sa atong mga ginikanan pinaagi sa mga propeta, sa niining kaulahiang mga adlaw pinaagi sa Iyang Anak nga si Jesus Cristo, tungod sa pagbanhaw Kaniya gikan sa mga patay.” Ug ania Siya sa atong taliwala, human ang duha ka libo ka tuig, ang mao rang Jesus, dili nga usa lang sa mga propeta; si Jesus, alleluya, ang nabanhaw nga Anak sa Dios!

¹⁶⁶ Miingon si Jesus, usa niadto ka adlaw, miingon Siya, “Ang dautan ug mananapaw nga kaliwatan nagapangita og usa ka ilhanan, ug usa ka ilhanan ang igahatag kanila.” Usa ka dautan ug mananapaw nga kaliwatan. Kanus-a ba nga ang kalibutan nahimong mas grabe pa ka dautan, o mas grabe pa ka mananapaw ug mas grabe pa ka hiwi, kay sa panahon karon?

¹⁶⁷ “Maingon sa nahitabo kaniadto sa mga adlaw ni Jonas, kung unsa nga si Jonas anaa sa tiyan sa balyena sulod sa tulo ka adlaw ug gabii, mao man usab ang Anak sa tawo nahiadto sa kinahiladman sa yuta sulod sa tulo ka adlaw ug gabii.”

¹⁶⁸ Kung ingon niana, “ang dautan ug mananapaw nga kaliwatan” makadawat og usa ka ilhanan. Unsa mang klase nga ilhanan? Usa ka ilhanan sa pagkabanhaw. Ug aduna kita niana karon, human sa duha ka libo ka tuig, buhi Siya sa gihapon. Ania Siya sa atong taliwala, karong gabhiona, ang mao sa gihapon kagahapon, karon, ug hangtud sa kahangturan, nagapaila sa Iyang Kaugalingon pinaagi sa mga kinaiyahan nga iya sa Dios, nga ginapadayag ang Pulong sa karong panahon nga Iyang gisaad nga pagabuhaton. Amen.

169 Ania na ang Pulong. Karon toohan ba ninyo ang maong ilhanan? kana ang sunod nga butang, sa kaulahiang adlaw, ang Iyang ilhanan pinaagi sa Iyang Anak. Himatikdi.

170 Ang Dios nakig-estorya kang Moises kaniadto sa nagkalainlaing panahon. Sa Deuteronomio 18:15, miingon, “Ang Ginoo nga imong Dios magapatindog og usa ka Propeta nga sama Kanako.” Karon bantayi. Kana mao ang Pulong. Kana ang Pulong. Kana ang Dios. Dili kana si Moises. Giunsa man pagkahibalo ni Moises niana? Tawo lang man siya. Apan ang Dios, nga nagasulti pinaagi kang Moises, ang mismong nagsulti niana. Nagatoo ba kamo niana? Sige.

171 Karon bantayi si Jesus, tan-awa kung unsa nga ang Iyang—Iyang mga kinaiyahan gipaila nga tinuod ang kining gisaad nga Pulong. Tinuod nga gipaila Niya gayud. Gipaila Siya sa nianang kinaiyahan nga giingon ni Moises kung unsa ang mamahimong kinaiyahan Niya.

172 Daghan kanila, nga susama karon, gusto nilang makakita og halangdon nga pangulo. “Oh, mao kini si Doktor Ph. *Si Ingon ani-ug-ingon ana*. Migraduwar siya sa Hartford University.” O, “Gikan siya sa inila kon diin man nga dapit nga sama niana.” Dili kana ang timailhan nga iya sa Dios. Dili, dili. Ni usa ka butang wala kana og ingon niana. Ang Pulong mao ang nagapaila sa Dios. Kita n’yo?

173 Dili eskolar si Jesus, ni usa ka sacerdote Siya, ni usa Siya ka rabbi, ngadto sa kalibutan. Usa ra Siya ka rebelde, sa tan-aw sa kalibutan.

174 Apan ginapamatuod sa Dios ang Iyang Pulong pinaagi Kaniya, nga mao ang naghimo Kaniya nga Emmanuel. Mao kana ang Iyang timailhan. Karon, ania, si Jesus nga ginabuhat ang eksakto kung unsa ang giingon sa Dios sa nagkalainlaing panahon nga Iyang pagabuhaton, nga pinaagi kang Moises, giingon kaniadto kung unsa ang Iyang pagabuhaton.

175 Karon bantayi sa dihang natagbo Niya si Pedro, sama sa pag-drama nato niini sa miaging gabii, niadtong nahinagbo Niya si Pedro ug gisulti kang Pedro kung unsa ang ngalan niini. Ginapaila niining ilhanan ang mga pag-angkon Niya ingon nga Mesias, ngadto kang Pedro, kay ang giingon sa Pulong, “Ang Ginoo nga inyong Dios magapatindog og usa ka Propeta.”

176 Ug miduol si Pedro, nga si Simon pa siya kaniadto, miduol siya sa kon asa Siya. Ug gitan-aw siya ni Jesus, nag-ingon, “Ang imong ngalan si Simon, ug ikaw mao ang anak ni Jonas.” Kana ang nagpaila sa kinaiyahan ni Cristo nga mao kadtong Pulong nga gisaad ni Moises. Naila ni Pedro nga kana nga ilhanan ang nagapaila kang Jesus nga mao ang Mesias. “Ang Dios anaa kang Cristo,” ang nagapangdihog sa kaulahiang mga adlaw. Alang kang Natanael... Hinumdumi, gisulti Niya kang Simon ang ngalan niini.

177 Karon, bantayi, ngadto kang Natanael gisulti Niya kung unsa ang gihimo niini. “Atua ka ilalum sa kahoy sa dihang nakita Ko ikaw.” Kana ang nagpaila Kaniya ingon nga Mesias.

178 Miingon, “Ikaw mao ang anak sa Dios. Ikaw mao ang Hari sa Israel.” Nailhan Siya pinaagi sa kinaiyahan sa gisaad nga Pulong nga Siya mao ang Mesias. “Ang Ginoo nga imong Dios magapatindog og usa ka Propeta.”

179 Ang babaye didto sa atabay, gisulti Niya kaniya kung unsa siya kaniadto, ug kana ang nagpaila Kaniya ingon nga mao kadtong gisaad nga Mesias. Kita n’yo?

180 Ang Iyang kinaiya, ang Iyang mga kinaiyahan, mao ang napaila nga Pulong. Ang Iyang mga kinaiyahan nagapakita nga ang Pulong mao ang Dios, busa ang Dios kana nga naila diha kang Cristo. Bantayi kini karon. Himatikdi.

181 Kang Pedro, napaila Siya kang Pedro pinaagi sa pagsulti sa ngalan niini. Napaila Siya kang Natanael pinaagi sa pagsulti sa gihimo niini. Napaila Siya ngadto sa maong babaye, pinaagi sa pagsulti sa kung unsa siya-nga-babaye. Kung unsa siya . . . kung kinsa si *Pedro*; kung unsa ang gihimo ni *Nataniel*; ug kung unsa *siya-nga-babaye*. Gipaila Niya ang pang-Mesias Niya nga kinaiyahan nga mao ang mamahimong kinaiyahan sa Mesias.

182 Tan-awa ang diyutay’ng babaye nga mao mismo ang gisulti. “Sir, naila ko nga Ikaw usa ka propeta. Wala pa kami nagkaaduna og propeta sa gatusan na ka tuig. Aduna kami og daghang mga kaiglesiahan, daghan nga mga pagsinumpakiay ug pang-denominasyon nga panagbingkil, apan wala pa kami nagkaaduna og propeta sa gatusan ka tuig. Nahibalo kami nga sa dihang moabot na ang Mesias, mao kini ang magpaila Kaniya.”

183 Miingon Siya, “Ako mao Siya, nga nagapakig-estorya kanimo.” Dili kana maingon nga walay klaro, “Ako mao Siya.” Mao kana ang nagpaila Kaniya.

184 Ang babaye nga nagtalinugo, naila niya nga Siya ang Pulong. Sa unsang paagi? Pinaagi sa gihimo Niya sa dihang nahikap Siya sa pagtoo sa maong babaye. Milingi Siya ug miingon, “Kinsa ang naghikap Kanako?” Nahibalo Siya nga aduna gyu’y nahitabo. Kana ang nagpaila kang Jesus ingon nga Mesias.

185 Nagtoo niini ang babaye, ug miingon siya, “Kon makahikap lang ako sa Iyang bisti, mamaayo gayud ako.”

186 Busa sa diha nga nahikap gyud niya, miliso Siya, miingon, “Kinsa ang naghikap Kanako?” Ug naglimod ang tanan kanila didto. Pero ang Iyang kinaiyahan nga pang-Mesias. . .

187 Amen! Nagalaum ako nga nakita ninyo kana, ang kongregasyon. Paminaw, sa dihang patapos na kita.

188 Didto gihikap niya Siya. Adunay mga gatusan, siguro, nga naningkamot nga mahikap Siya. Ngani gibadlong Siya ni Pedro, miingon, “Bueno, tanan man sila nagahikap Kanimo.”

189 Miingon Siya, “Oo, pero naay naghikap Kanako nga lahi.” Mao kana ang nagpalahi, kanang paghikap nga iya sa pagtoo. Kita n’yo? Miingon, “Naay naghikap Kanako. Lahi kini nga paghikap. Naluya Ako. Adunay kusog mga migawas gikan Kanako. Adunay gahum nga migawas gikan Kanako.” Karon, didto Siya nga nagatindog.

190 Karon, bisan ang Mismo Niyang tinun-an nagsulti, medyo sa ingon niining pagkasulti, “Mora Ka man—niana og delingkwente Ka nga tawo. Aba, ang mga tawo, ang tanan na naghikap Kanimo.”

191 Tan-awa ang Iyang, tan-awa ang Iyang timailhan karon. Milingi Siya, naglantaw sa kadaghanan. Puntiryang gitudlo Niya ang maong babaye. Dili na maitago sa babaye ang iyang kaugalingon. Gisulti ni Jesus ngadto kaniya ang iyang kahintang, ug nag-ingon, “Ang iyang pagtoo mao’y nag-ayo kaniya.”

192 Naila sa babaye, pinaagi niadto, kana, ang Mga Hebreohanon 4:12, “Ang Pulong nagatugkad sa mga hunahuna, sa mga katuyoan sa kasingkasing.” Ang Iyang kinaiyahan ang nagpaila Kaniya nga mao “ang Pulong sa Dios nga nahimong unod ug nagapuyo ipon nato.” Amen.

193 Nagatoo ko nga ang mao rang butang ang magpaila Kaniya karong gabhiona, ang nabanhaw nga si Jesus Cristo ingon nga buhi sa atong taliwala karong gabhiona, ang mao ra sa gihapon kagahapon, karon, ug hangtud sa kahangturan. Karon, ingon nga matuod ang Mga Hebreohanon 13:8, ang Iyang kinaiya mao ang magpaila Kaniya karon, sama sa gibuhat niini kaniadto, sa mao ra nga pamaagi.

194 Tan-awa si Cleopas ug sila, human sa pagkabanhaw. Gipaila ni Jesus ang Iyang Kaugalingon pinaagi sa kung giunsa Niya pagpikas-pikas ang tinapay, nga gibuhat Niya kadto sa eksakto gayud kung giunsa Niya kini pagbuhat sa wala pa Siya gilansang sa krus. Ug sila... Kana ang nagpaila sa Iyang kinaiyahan, tungod sa ingon nianang pamaagi Niya gibuhat kadto.

195 Karon kon ania Siya dinhi karong gabhiona, unsaon Niya pagpaila sa Iyang Kaugalingon? Sama sa Iyang gihimo kaniadto, tungod kay Siya mao sa gihapon karon, ug mao sa gihapon hangtud sa kahangturan. Mao kana ang timailhan. Mga Hebreohanon 4, kuwatro... 14 ug 15, “Siya karon...” Nagaingon, “Siya mao ang atong Labaw’ng Sacerdote nga arang matandog sa pagbati sa atong mga kaluyahon.” Siya mao ang atong Labaw’ng Sacerdote karon. Human sa Iyang pagkabanhaw, human sa Iyang kamatayon, human sa Iyang paglubong, human sa Iyang pagkabanhaw, human sa Iyang pagkayab, amen, Siya sa gihapon nagpabilin nga mao sa gihapon kagahapon, karon, ug hangtud sa kahangturan, usa ka Labaw’ng Sacerdote nga arang matandog sa pagbati sa atong

mga kaluyahon. Amen. Ingon niana Siya, karon mismo, alang ngadto sa matag lalaki ug babaye dinhi nga magatoo niini. Siya mao ang atong Labaw'ng Sacerdote, nga mao sa gihapon kagahapon, karon, ug hangtud sa kahangturan.

¹⁹⁶ Nagapadayon Siya nga buhi. Nagatoo ba kamo niana? [Nagaingon ang kongregasyon, "Amen."—Ed.] Ang Iyang mga kinaiyahan nagapadayon nga mao ra sa gihapon ang nagapaila Kaniya sama sa kung unsa Siya niadtong ania pa Siya sa kalibutan. Siya sa gihapon buhi karon, ning gabhiona, sa porma nga Balaang Espiritu. Sa gihapon buhi Siya. Ug ang Iyang mga kinaiyahan nagsunod Kaniya, maingon sa ginabuhat niini sa una pa, kon Siya nagpabilin nga buhi sa gihapon.

¹⁹⁷ Ako mapasalamaton, karong gabhiona, nga, "Ang Dios, sa nagkalainlaing kapanahonan ug sa nagkalainlaing pamaagi nakig-estorya sa atong mga ginikanan pinaagi sa mga propeta, sa niining katapusang mga adlaw pinaagi sa Iyang Anak nga si Jesus Cristo."

¹⁹⁸ My, wala ko kabantay nga taas na man diay kaayo akong estorya. Nakalimot ako bahin niana. Pasensyahi n'yo ko. Ako nang . . ihunong.

Mag-ampo kita.

¹⁹⁹ Langitnong Amahan, halangdon og maloloy-on nga Dios! Ginoo, ako—ako . . tingali nasobrahan ko ang pagpanulti. Nagaampo ako, Dios, kon nasobrahan ko man, pasayloon Mo ako. Apan, Ginoo, dili ko mapangayoan og pasaylo kon unsa man ang akong napangsulti. Gisulti ko man lang kon unsa ang Imong gisulti dinhi sa Imong Pulong.

²⁰⁰ Karon bisan usa o duha ra ka pulong gikan Kanimo, Ginoo, mahimong makita na kini sa tanan dinhi karong gabhiona. Ang mga kabus, mga tawong may sakit mamaayo gayud pagmakita nila nga Ikaw sa gihapon ang among daku ug Labaw'ng Sacerdote. Nagaampo ako, Ginoo, sa sunod niining gamay'ng mga minuto, nga Imong himoon kining Mensahe nga buhing realidad pag-usab. Kon unsa ang akong gisulti sa Pulong, hinaut nga ipaila Ka sa Imong kinaiyahan sa taliwala namo, karong gabhiona, nga Ikaw mao sa gihapon kagahapon, karon, ug hangtud sa kahangturan, tungod kay kini among ginapangayo sa Ngalan ni Jesus. Amen.

²⁰¹ Karon sa makadiyut lang. Kita, ako—ako medyo nalangan, pero makapag-pasensiya pa ba mo og igo aron makapahigayon pa kita og prayer line sulod sa kinse, baynte minutos? Kung motugot mo, itaas ang inyong kamot, moingon, "Kami . . ." Sige, salamat—salamat kaninyo. Ginasaad ko nga makagawas na mo sa alas nuebe y media. Ang oras karon; adunay baynte minutos pa. Busa kon hatagan ninyo ako mga diyos minutos, dalion ko.

²⁰² Tan-awon nato, unsa nga prayer card ang ilang gipanghatag karong adlaw? [Nagaingon ang igsoong lalaki, "O."—Ed.] O?

Unsa, asa man ta nagsugod sa miaging gabii, sa uno, uno? [“Nagtoo ako nga sa uno.”] Oo, uh-huh.

²⁰³ Ug unya kita, kagabii, ato lang... ang Balaang Espiritu... gipaminawan ko karong adlaw, ug gipangbalikan ang gisulti na. Ang uban niadto mga ngalang Pranses, ako’y... Ang Balaang Espiritu; ang bugtong butang nga mahimo ko kini, mao ang magpaabot lang ug magtan-aw.

²⁰⁴ Kita n’yo, usahay pagmakakita ka og panan-awon, gikinahanglan nga mabalikan kini ug mahubad. Ginahubad kini. Sa usa ka panan-awon, pananglitan ikaw—ikaw makakita og usa—usa ka karnero, mahimong ang buot ginapasabot niana og balhibo sa karnero. Kita n’yo, gikinahanglan mo pud ang hubad niana, kita n’yo, ug balikan kanang panan-awon ug ihubad kini.

²⁰⁵ Ug nabantayan nako kagabii, dili nako—dili nako malitok kadtong Pranses nga mga ngalan, kinahanglan ko pa kadto spelingon.

²⁰⁶ Didto sa Africa ug didto dapit sa mga Hottentot ug mga pagano, ug ingon-anang mga lugar, husto mismo ang pagkalitok Niini sa ilang ngalan, sultihan sila kung kinsa sila, diretsong ginalitok diha sa ilang pinulungan. Sila, mahibal-an nila kung unsa kadto, dihadiha pagkalitok mo. Pero, kita n’yo, pero nahibalo Siya sa tanan nga mga pinulongan. Siya mao ang Dios nga Eternal.

²⁰⁷ Magsugod kita karong gabii gikan sa, ingnon nato, setentay-singko, padulong sa usa ka gatus, diha sa O. O ba, mao ba na ang iyang giingon? Akong... [Nagaingon ang igsoong lalaki, “Oo. O.”—Ed.] O, O. Oo. Sige. Kinsa ang adunay prayer card nga setentay-singko, tan-awon nato kini? Sa O, prayer card nga O, setentay-singko, ipataas imong kamot, kung kinsa man ang nakakuha niini. Sa O. Sige. Duol ka *dinhi*. Setentay-singko, otsenta, otsentay-singko, nobenta, nobentay-singko, usa ka gatus, anhi ka *niining* dapita kung puede. Sige, kini, linya ka *dinhi*, dayon, ’kay wala na kita’y oras. Mosalig ko nga inyong buhaton kana.

²⁰⁸ Tan-awa ang inyong prayer card. Tan-awa ang prayer card sa inyong abay. Unsa ang... Ug kung aduna ma’y dili makalakaw, dalha sila *dinhi* sa prayer line. Busa kon sila nakakuha sa O, pareho sa O, setentay-... .

²⁰⁹ Setentay-singko paingon sa usa ka gatus, linya mo *dinhing* dapita, kung mahimo niyo. Asa man kamo, sa balkone, o bisan asa man, pagduol *dinhi*, ug anhi kamo sa linya sa madali sa inyong mahimo, kung mahimo n’yo, sa pagdaginot og oras.

²¹⁰ Karon ang uban kaninyo *dinhi*, nga wala’y prayer card, puede ba ipataas ninyo ang inyong mga kamot ug moingon, “Wala ako’y prayer card, Igsoong Branham, pero nagatoo ako”? Ipataas ang inyong mga kamot.

211 Timan-i karon, magapakigsulti ako kaninyo mahitungod sa maong Labaw'ng Sacerdote. "Siya ang Labaw'ng Sacerdote nga arang matandog sa pagbati sa atong mga kaluyahon." Siya mao si *Jehovah-Jireh*, "inandam nga halad sa Ginoo." Siya mao si *Jehovah-Rapha*, "ang Ginoo nga nagaayo sa tanan mong mga balatian." Nagatoo ba kamo niana? [Nagaingon ang kongregasyon, "Amen."—Ed.] Siya mao si *Jehovah-Manasseh*. Ang *taming*, ang *pangsagang*, ang atong *pakigdait*, mao Siya sa gihapon. Bueno, pila man ang nagatoo nga kanang tanan nga pangtubos nga ngalan ni Jehovah nagpahinangod kang Jesus? ["Amen."] Siguradong, mao gyud kana Siya. Kon Siya—kon Siya . . . Aba, dili kini mabulag-bulag, busa Siya mao gayud ang kinatibuk-an niini. Ug kon Siya sa gihapon mao si Jehovah-Jireh, Siya mao pud si Jehovah-Rapha. Kon Siya si Jehovah-Jireh . . . Siya si *Jehovah-Jireh*, nga mao "ang inandam nga halad sa Ginoo para sa kaluwasan," kung ingon-ana Siya usab mao si *Jehovah-Rapha* nga "nagaayo sa tanan natong balatian." Amen. Ang pag-ayo nagagikan lamang sa Dios.

212 Sige, samtang nagalinya ang mga tawo; wala na ako panahon aron matan-aw kon kinsa sila ug unsa sila. Pero karon, tanan kaninyo dinha nga nahibalo nga wala ako nakaila kaninyo, ipataas ang inyong kamot, nga nagaingon, "Nanginahanglan ako sa Dios. Pero wala man ka nakaila kanako, Igsoong Branham, pero nanginahanglan ako sa Dios. Ipataas lang nako ang akong kamot."

213 Karon kung magpuyo lang mo sa pipila ka minutos, magbantay, mag-amping, maghilom lang. Karon dili ko buot ipasabot, nga kung mosulti ko'g, "maghilom," . . . Kung aduna ma'y buhaton ang Ginoo, dayon gusto ninyong modayeg sa Ginoo; pagsimba kana. Pero ang buot kong ipasabot, "kanang paglakaw-lakaw, pagtindog-tindog," kabalo mo, wala kana'y pagtahud. Kita n'yo? Ug ang Balaang Espiritu sensitibo kaayo, sensitibo kaayo. Kita n'yo? Unsa man nga butang nga sama niana, mawala na dayon kanako, ug kinahanglan ko na pud nga manlimbasog, pag-usab, kita n'yo. Apan kung maminaw lang kamo!

214 Nahinumduman ba ninyo ang una Niyang saad? "Patooha ang mga tawo kanimo, ug magma-sinsero lang, walay bisan unsa man ang makababag sa maong pag-ampo." Nahinumduman ba ninyo kana? [Nagaingon ang kongregasyon, "Amen."—Ed.] Husto kana. Ug kana'y . . . Wala pa nako makita kini nga napakyas, ug dili gayud kini mapakyas. Iya kini sa Dios.

215 Karon magdali kita sa prayer line, aron mahuman nato ang taman sa atong maabot, alang sa mga tawo. Pero kamong mga walay prayer card ug wala matawag karong gabhiona, guniti lang ang inyong card, maapil ra kamo namo. Sige.

216 Karon kamo dinha nga walay prayer card, hinumdumi. O, kamo dinha, kung aduna man o wala kamo og prayer card,

toohi lang nga Siya mao sa Mga Hebreohanon ang ika-4 nga kapitulo dinhi. “Siya mao ang Labaw’ng Sacerdote nga arang matandog sa pagbati sa atong mga kaluyahon.” Tan-awa kon nagpabilin Siya nga mao ra sa gihapon... Tan-awa kon si Jehovah nagpresentar sa Iyang Kaugalingon diha sa Iyang mga katawhan, sama sa Iyang gihimo sa mga adlaw sa Sodoma. Sige.

217 Sige, sir. Mag-ampo kita karon, magmatinahuron gayud. Hinumdumi karon, usa ra ka Pulong nga gikan sa Dios labaw pa kay sa isulti ni bisan kinsa. Karon, kining tawo dinhi, ako—ako wala makaila kaniya. Ug tingali siya’y... Estranghero ka kanako, di ba, sir? [Nagaingon ang igsoong lalaki, “Oo.”—Ed.] Wala ta ka hiihi. Usa lang ka butang ang atong nahibaloan, nga pareho kitang kinahanglan magabarug didto sa Presensiya sa Dios sa umalabot nga adlaw; ingon nga tawo, kinahanglan kitang magkitaay Didto. Mao kini ang una natong panagkitaay.

218 Karon kon moduol ka dinhi, kon adunay sakit ka man, wala ako nahibalo; kini mahimong lahi nga butang, kita n’yo. Apan kung akong—kung akong pagapandongan ikaw, nga moingon, “Dalaygon ang Gino! Lakaw, og mamaayo ka na.” Maayo man kana. Mahimong toohan mo kana. Pero unsa kaha kon isaysay Niya kanimo kung unsay sakit nimo? Karon, kita n’yo, lahi na kana, sa ingon niana mahibal-an mo nga pagpaila na kana sa Iyang kinaiyahan. Kita n’yo, dili ko na kana kinaiyahan. Tawo ra ko; wala ko’y unsa man nga nahibaloan bahin kaniya. Bag-ohay ko lang gisulti kaniya, “Wala ako makaila kanimo.” Wala pud siya makaila kanako. Pero unsa ma’y mahimo niana? Igapaila niana ang kinaiyahan ni Jesus Cristo nga mao sa gihapon kagahapon, karon, ug hangtud sa kahangturan. Ginapahibalo nga dili niini mahimong ako, dili mahimong ako, tungod nga wala ako makaila sa maong tawo. Ipataas ko ang akong kamot; *ania* ang Pulong. Kita n’yo? Wala ako makaila kaniya. Wala siya makaila kanako. Apan ang kinaiyahan ni Jesus Cristo... .

219 Kung nagatindog si Jesus dinhi, ug kini nga tawo, adunay sakit, kon moingon siya, “Ginoong Jesus, ayoha ako,” unsa man ang isulti ni Jesus kaniya? “Human na Nako gibuhat kini.” Husto ba kana? [Nagaingon ang kongregasyon, “Amen.”—Ed.]

220 “Gisamaran Siya tungod sa atong mga paglapas; pinaagi sa Iyang mga labod kita nangaayo.” Ang tanang katubsananan nga atong mahimong madawat nahuman na didto sa Kalbaryo. Sukad niadto, pinaagi na sa pagtoo, ang pagtoo sa maong nahuman na nga buhat. Husto ba kana? [Nagaingon ang kongregasyon, “Amen.”—Ed.] Sige.

221 Karon, kon si Jesus buhi, ug nasulti ko na ang bahin sa Iyang Pulong... . Ania na karon, balik na sad nianang kayano ug pagtoo, ang pag-too sa Iyang Pulong. Sa dihang gihinagbo Niya ako niadtong gabhiona, miingon Siya, “Magasingabot diha kanimo nga mahibal-an mo ang mga tinago sa ilang

kasingkasing. Dili man nila toohan ang unang ilhanan sa imong kamot, pagatoohan nila kining usa.” Kita n’yo? “Pag-dili nila toohan kana, nan pagatunglohon sa dugo ang yuta.”

²²² Sama ra sa nahitabo sa panahon ni Moises. Nag-ingon, “Pag-dili sila motoo sa niining duha ka ilhanan, nan ibubo ang dugo sa yuta,” kita n’yo, “ibubo ang tubig sa yuta, mamahimo kining dugo.”

²²³ Aron lang nga mahibaloan karon, kon makita ko lang kung unsa ang imong problema, igo na kana aron matagbaw ka ug motoo ka, dili ba? [Nagaingon ang igsoong lalaki “Sigurado.”—Ed.] Mahibaloan mo nga kini mao ang kinaiyahan sa Personang akong ginahisgotan, si Jesus Cristo.

²²⁴ Kini nga tawo, sa akong pagtan-aw kaniya, nagabalik. Adunay landong kaniya. Walay tambal nga makatabang man lang sa maong tawo. Anaa siya sa himalatyon na nga kahimtang. Husto kana. Naoperahan na siya, ug ang maong operasyon usa ka pag-opera sa prostate. Ug kanser kini, ug nilukop na sa imo ang kanser. Kung husto kana, ipataas ang imong kamot. Ang Dios lamang ang makaayo kaniya. [Nagaingon ang igsoon, “Alleluya! Alleluya! Alleluya!”—Ed.] Pero, tan-awa, usa ka butang ang gusto kong isulti kanimo, sir. Kana nga yawa mahimong nakatago gikan sa kutsilyo sa doctor, pero dili siya makatago sa Dios. Nagatoo ka ba niana? Nagatoo ka ba niana? [“Oh! Oh!”] Kung ingon-ana magaampo ako, nga, sa Ngalan ni Jesus Cristo, nga ang maong butang magabiya kaniya, nga unta mabuhi pa ang maong tawo. Wala; nagluya lang. Sige.

²²⁵ Ikaw ug ako dili magkaila sa usa’g usa, usa ka lalaki ug usa ka babaye nga nagkahinagbo. Karon, ingon nga lalaki, wala ako makaila kanimo. Ug tingali, ingon nga usa ka babaye, wala ikaw makaila kanako; gawas lang siguro nga imong nakit-an ang akong ngalan, o retrato, o unsa man nga sama niana. Apan wala kita nagka-ilhanay sa usa’g usa. Mao kana ang atong mga kinaiya. Wala kita mahibalo sa atong kinaiya sa usa’g usa. Apan ang kinaiyahan ni Cristo, Siya mao ang Pulong, ug ang maong Pulong gikasaad alang niining adlaw. Nadungog mo na ako nga nagasulti mahitungod niini. Kung ingon-ana igapaila Siya sa Iyang mga kinaiyahan dinhi mismo. Dili nga ako ang magpaila Kaniya. Wala ako makaila kanimo. Nasabtan mo. Ang atong—atong kongregasyon nakasabot ba niini? [Nagaingon ang kongregasyon, “Amen.”—Ed.] Kita n’yo? Ako—usa lang ako ka tawo. Igsoon mo lang ako.

²²⁶ Sama sa babaye didto sa atabay, gisultihan sa kung unsay problema, sakit nga anaa kanimo, o kung unsay imong gihangyo, o kung unsay imong gianhi dinhi. Tugoti nga ang Dios ang maghukom niana. Nagaantus ikaw sa sakit nga anemia. Husto kana, dili ba? [Nagaingon ang igsoong babaye, “Oo.”—Ed.]

227 Ako—kanunay kong masapon kana, adunay tawong naghunahuna nga ginatagna-tagna ko lang kono kana. Wala ko gipanalagma kana. Wala. Sa matag karon ug unya, mabati ko kana, kanang tawhana. Dili mo maitago ang inyong hunahuna karon. Karon aduna dinha, nasayod ko, adunay duha dinhi nga nagalingkod nga grabe gayud ka maduhaduhaon. Kita n'yo? Busa timan-i karon nga mahimo kong tawgon ang inyong ngalan, usab, mahimo kini sa Dios, busa ihunong ninyo ang paghunahuna niana. Tugoti nga ipakita ko kaninyo.

228 Tan-aw dinhi, gining. Tan-aw kanako. Wala ako mahibalo kon unsa ang Iyang gisulti kanimo, apan ako—ako nasayod kung unsa gayud Siya. Ug Iya kanang napaila nga kinaiyahan. Oo, sakit kini nga anemia, ang dugo, tubig.

229 Karon, ania, ania pa ang usa ka butang. Tan-awa kung abi ba nila pagpanaghap kini. Aduna ka'y bata nga imong ginaampo, nga ania dinhi. [Nagaingon ang igsoong babaye, "Oo,"—Ed.] Husto kana. Adunay problema, sa iyahang tutunlan, ["Oo."], tonsilitis, adenoids. Nakatakda na kini nga maoperahan. Dili ba husto kana? ["Oo."] Dalha kanang panyo ug ibutang sa ibabaw niini, ug toohi. ["Oo."] Ayaw pagduhaduha. Dili na kini kinahanglan nga maoperahan pa. Karon toohi sa tibuok mong kasingkasing.

230 Kumusta ka? Ang problema, sa niining babaye dinhi, nga adunay gikahadlokang kang usa ka butang. Nahadlok ka nga ang usa ka lihi nahimo nang kanser. Uh-huh, uh-huh. Karon lumakaw ka, nga nagatoo, ug dili na kana mamahimong ingon niana. Lumakaw ka lamang, nga nagatoo sa tibuok mong kasingkasing. Ang maong mga kinaiyahan, dili ako; kondili Iyaha gayud!

231 Nagatoo na ba kamo karon? [Nagaingon ang kongregasyon, "Amen."—Ed.] Magpahinungdan kana kinahanglan nga magtoo ang tanan. ["Amen!"]

232 Karon, wala ako makaila kanimo. Usa ako ka estranghero kanimo. Nakaila ang Dios kanimo. Nagatoo ka ba niana...? Nahibalo ka nga wala ako makaila kanimo, ug nahibalo ka nga wala ikaw makaila kanako, busa nagatoo ba ikaw nga kining Espiritu nga nagapanulti dili mahimong akong espiritu? Tungod, ako, ingon nga tawo lang, wala ako makaila kanimo. Apan ang kinaiyahan niining gisaad nga Pulong mao ang Pulong nga labi pang mahait kay sa espada nga duhay-sulab, ug motugkad sa mga hunahuna ug mga katuyoan sa kasingkasing.

233 Grabe ka kamasakiton. Aduna ka'y sakit nga iya sa babaye, nga naa sa imong matres, ug kana nga matres adunay kanser. Ug miadto ka ug nagpailalum ka sa kung unsa nga klase nga pagpanambal, usa kadto ka radium nga pagpanambal, ug ang bugtong butang nga nabuhat niadto mao'y samot pang gipakaylap kadto sa tibuok mong lawas. Ug ikaw—ikaw

mamatay kung dili ka pagaayohon sa Dios. Tinuod kana. Nagatoo ka ba karon nga pagaayohon ka Niya? [Nagaingon ang igsoong babaye, “Oo.”—Ed.] Hinaut nga hinginlan sa Dios sa Langit ang maong yawa nga mitago gikan sa doctor. [“Oh!”] Mahimong nakatago man siya sa radium, apan dili sa Espiritu Santo. Lakaw, toohi Siya, karon, igsoon. Ayaw pagduhaduha man lang, kondili toohi gayud.

²³⁴ Nagatoo ka ba nga mahimong ayohon sa Dios ang kanang sakit nga hubak, mamaayo ka na? [Nagaingon ang igsoong lalaki, “Oo.”—Ed.] Nagatoo ka ba niini? Nan lakaw ngadto sa imong pagaadtoan, nga nagakalipay, nga nagaingon, “Salamat, Gino. Nagatoo ako nga ang akong hubak wala na.”

²³⁵ Kumusta ka? Ginerbiyos ka. Taas na nga panahon nga aduna ka’y nerbiyos. Tungod niana, nagpahinungdan kana sa peptic ulcer diha sa imong tiyan, nga nagpahimo sa imong—imong sakit sa tiyan. Ug gusto nimo. . . Gusto ba nimong makapanihapon na? Himoon ba nimo kung unsa ang isulti ko kanimo nga imong pagabuhaton? Lakaw, og pagkaon na, sa Ngalan ni Ginoong Jesus.

²³⁶ Nagatoo ka ba sa tibuok mong kasingkasing? [Nagaingon ang igsoong babaye, “Nagatoo ako.”—Ed.] Mahimsog ikaw nga batan-ong babaye, kon lantawon. Nagatoo ka ba nga Iya akong alagad? [“Amen.”] Nagatoo ka ba nga ang Iyang kinaiyahan ania dinhi, aron. . . ang Pulong, Mismo, ug ang saad alang niining adlaw, “Ang mga buhat nga Akong ginabuhat inyo usab pagabuhaton”? [“Amen.”] Dili ko mahimong ayohon ka. Human na Niyang gibuhat kana; pero ang Iyang kinaiyahan mao’y magapakita Kaniya, nga masulti kung unsay diperensya kanimo. Aduna ka’y sakit nga iya sa babaye, pang-babaye nga sakit. [“Oo, sir.”] Nagatoo ka ba nga giayo na kini sa Dios karon? [“Oo. Amen.”] Lumakaw ka, dili na kini magasamok pa kanimo. Toohi sa tibuok mong kasingkasing.

²³⁷ Nagatoo ka ba kanako nga Iyang alagad? [Nagaingon ang igsoong babaye, “Oo, sir.”—Ed.] Kon isulti kanako sa Dios kung unsa’y problema kanimo, magatoo ka ba nga kini mao ang kinaiyahan ni Jesus Cristo? Anaa kini sa imong likod. Wala na kini. Lakaw, toohi sa tibuok mong kasingkasing. Toohi.

²³⁸ Duol, gining. Aduna usab ikaw og sakit sa tiyan. Toohi sa tibuok mong kasingkasing, ug lakaw og kaona na ang imong panihapon. Kalimti na ang bahin niini. Giayo ka na ni Jesus Cristo.

²³⁹ Ari ka. Ang imong sakit anaa sa imong dugo. Aduna ka’y diabetes. Nagatoo ka ba nga ayohon ka sa Dios ug himoon kang maayo na niana? Lakaw ngadto sa imong adtoan, ug ingna, “Salamat, Ginoong Jesus,” himoon kang maayo na. Lakaw, toohi sa tibuok mong kasingkasing.

240 Ari ka. Ang imong likod, nagatoo ka ba nga ayohon sa Dios ang imong likod ug himoon kang maayo na? Lakaw ngadto sa imong adtoan, ug magmalipayon, ug ingna, “Salamat, Ginoong Jesus.”

241 Aduna usab ikaw og problema sa imong likod. Padayon lang sa paglakaw, nga nagaingon, “Salamat, Ginoong. Naayo na ako.” Toohi kini sa tibuok mong kasingkasing.

242 Aduna usab ikaw og problema sa likod. Unsa ma’y nahibaloan mo bahin niana? Toohi sa tibuok mong kasingkasing karon, ug lakaw ngadto sa imong adtoan ug mamaayo na. Toohi nga si Jesus Cristo nag-ayo na kanimo. “Kung mahimo mong toohan, ang tanang butang mahimo.” Sige.

243 Unsa kaha kung wala ko’y gisulti og unsa man kanimo, milabay lang ug gipandongan og kamot kini nga babaye, nagatoo ba kamo nga mamaayo siya? Nakita nila kung unsa ang sakit. Nagatoo ba kamo nga mamaayo siya? Duol ngari. Akong ginahinginlan kini nga yawa, sa Ngalan ni Jesus Cristo. Hinaut nga ang gahum sa Dios magaaayo sa niining bata. Amen. Ayaw pagduhaduha, ayaw pagduhaduha man lang, ug mamaayo siya. Toohi sa tibuok mong kasingkasing.

244 Kon ang Dios dili magaaayo kanimo, magasungkod ka na lang sa umalabot nga adlaw, tungod sa arthritis. Apan nagatoo ka ba nga ang Dios magaaayo sa imong arthritis? Kon ingon-ana lakaw, nga nagaingon, “Salamat, Ginoong. Magatoo ako Kanimo, ug pagaayohon Mo ako.” Sige.

245 Ari ka. Tungod kini sa imong pangedaron. Grabe ang imong nerbiyos. Ginanerbiyos ka og ayo, pag-gabii na. Pag-magtrabaho ka ug tanan na, ginaniyerbiyos ka og ayo. Nagatoo ka ba karon? Dili na kini magsamok pa kanimo kung ingon-ana. Lakaw ngadto sa imong adtoan, nga nagaingon, “Salamat, Ginoong Jesus.”

246 Duol ngari, sir. Nagatoo ka ba nga ang Dios nagaayo og mga sakit sa kasingkasing? [Nagaingon ang igsoong lalaki, “Oo.”—Ed.] Gusto mong pagaayohon ang imong kasingkasing? Magpadayon ka lang sa paglakaw, nga nagaingon, “Salamat, Ginoong. Nagatoo ako sa tibuok kong kasingkasing.”

247 Nagaayo ang Dios og mga sakit nga TB, ug mamaayo, usab. Nagatoo ka ba niana, sir, sa tibuok mong kasingkasing? [Nagaingon ang igsoong lalaki, “Nagatoo ako niini.”—Ed.] Sige. Lakaw ngadto sa imong adtoan ug magmalipayon, nga nagaingon, “Salamat, Ginoong Jesus.”

248 Unsa na man ang bahin kaninyo dinha, nagatoo ba kamo? Kamong nagalingkod dinha? Uban kaninyo dinha nga nagalingkod pag-too karon.

249 Kining lalaki nga nagalingkod dinhi, nga adunay bronchitis, nagatoo ka ba nga pagaayohon ka sa Dios gikan sa imong

bronchial nga sakit? Sige, maangkon mo kung unsay imong gihangyo, kung ingon-ana. Amen.

²⁵⁰ Taas ang presyon sa imong dugo, ikaw nga nagalingkod dinha sa luyo nianang lalaki. Nagatoo ka ba nga pagaayohon sa Dios ang taas nga presyon sa imong dugo? Gibiyaan ka na niini, sir. Wala ako makaila kaniya, wala ko pa gayud siya makita sa tibuok kong kinabuhi.


²⁵¹ Ikaw, sir, nagatoo ka ba nga ang pamikog sa mga kaunoran mo, mga pagpamikog sa kaunoran tungod sa nerbiyos, nagatoo ka ba nga pagaayohon kini sa Dios? Nagatoo ka ba? Ipataas ang imong kamot kung nagatoo ka. Sige.

²⁵² Ang imong asawa nga naglingkod dinha, ginapa-problema siya sa sakit nga sinusitis. Nagatoo ka ba nga gibiyaan ka na niini, usab, igsoong babaye?

²⁵³ Ang gining nga nagalingkod mismo sa luyo nato dinha, aduna siya og neuritis. Nagatoo ka ba nga pagaayohon sa Dios ang imong neuritis, gining?

²⁵⁴ Ania pud dinhi ang usa ka gining nga naka-americana, naka-americana og pula, dinhi. Nagalingkod siya dinhang dapita. Aduna siya og sakit nga sinusitis, usab. Nagatoo ka ba nga pagaayohon sa Dios ang imong sakit nga sinusitis? Ipataas ang imong kamot, kung nagatoo ka niini.

²⁵⁵ Ang si kinsa man nga ania dinhi nga nagatoo nga ang mga kinaiyahan ni Jesus Cristo ania sa taliwala kanato, karong gabhiona, ipataas ang inyong kamot, og moingon, “Nagatoo ako niini.” [Nagakalipay ug nagaingon ang kongregasyon, “Nagatoo ako niini!”—Ed.]

²⁵⁶ Ang tanan nga ania dinhi, nga magadawat Kaniya ingon nga inyong mananambal, magtindog kamo, ug ingnon ninyo, “Nagatoo ako niini.” Pagtindog. Tindog, gikan sa inyong mga lingkuranan, unsa man kini. Si Jesus Cristo mao sa gihapon kagahapon, karon, ug hangtud sa kahangturan. Ginahatag ko Siya ganha kaninyo, sa Ngalan sa Ginoong Dios. 

ANG DIOS NGA GINAPAILA ANG IYANG KAUGALINGON
PINAAGI SA IYANG MGA KINAIYAHAN CEB64-0320
(God Identifying Himself By His Characteristics)

Kining Mensahe ni Igsoong William Marrion Branham, una giwali sa Ingles niadtong Biyernes sa gabii, Marso 20, 1964, sa Denham Springs High School sa Denham Springs, Louisiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org